


13

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 15 1933

T 3204/4932





蘇州府志卷第二十二

壇廟二

長洲縣社稷壇在縣治西南四十九步宋建元因之明廢統祭

於府壇

宋孫應時長洲縣重修社壇記古之制祀以社次郊

國非穀不食故有社斯有稷勾龍於土棄於穀厥有大造開

濟萬世故以為配春秋祈報之外救災出火師田行役獻功

明乎其義治國其如指諸掌乎世衰王制壞古義隱妖妄百

出而祠廟蠲興褻天蠹民幻為淫威日盛月滋上之人不以

禁又從與之天下郡縣雖通祀社稷世守不廢以為三代之

舊章然獨其制度之形似儀物之文具而已有司者一歲再
祀民不與觀也民於社日或各從其俚俗鼓舞迎享醉飽相
樂不知其何神且何禮也水旱禳祈奔走如織於社稷缺如
也於乎知古者得無太息於斯乎今令甲守令下車必視社
稷飭壇墠而遵用或寡且諉曰小祀祀亦不親其事至若倚
郭之縣自為社於闔閭偏仄之間往往滅裂最甚長洲縣之



社在吳郡城內當縣治西南四十九步荒毀有年慶元四年九月知縣事天台黃侯宜一治新之壇宇中度門垣覲深塗巷闢闢率僚吏時祀必謹黃侯儒者為縣如古循吏多善政可誦此其細事若不待書雖然愛禮者存羊因今之制存古之意君子重之縣實小侯承天子之命司社與民固未有忽畧社稷而能父母其民者也然則凡黃侯之善政將自社稷壇始予是以記之因詔來者知所繼焉李心傳淳祐重闢社壇記自昔有邦家者其祀事莫尊於社稷以尚書周禮中庸參考之社之祀率與郊並蓋郊之祭則天也上帝也社之祭則地也后土也天以氣言則一而已故惟天子則祭之地以形言則提封有廣狹之異故自王朝列國下逮卿大夫州邑都鄙之間各有祀焉蓋祈報之行於是乎在也後世此義不明而社稷列乎宗廟之下則失之矣今之縣古子男之國也國家欽崇典祀雖循漢唐之舊而社稷壇壝特嚴其制部刺史巡歷所至必謹視之重民事也平江在東南為大府其所治長洲在浙中為壯縣而長民之吏揭虔者罕春秋二祀有壇無宇神靡顧歆水旱螟蟲無歲不有而養民餉軍之大計莫知所出矣淳祐元年春趙君汝礪以選來為令濮邸近屬安化王曾孫也學古入官三試禮部西山真文忠公與羣彥交舉之以是通籍始至按視惕然靡寧載經載營猶未定也

會邑之姦民有以訾力為害於私者刑獄使者陳公稔知其惡因其自致按法論罪移之他邦邑父老乃請趙君更其嘗售之屋廬為齋居望祀之所趙君以白陳公公許之夏五月己亥興工架月而畢壇壝尊崇垣墉畢備費皆出於有司而民不與於是雨暘以時歲則大熟趙君以記文為請且曰善治者既去而訓民事神又得其所是陳公之賜也不可以不書陳公名塏字子爽今以秘閣修撰為沿海制置使

風雲雷雨境內山川城隍神壇統祭於府壇

先農壇在縣治南南新橋西即府壇

本朝雍正五年

敕建

厲壇附祭郡厲壇舊有鄉厲壇在縣境共七百四十一所今久廢

城隍廟在府城隍廟儀門左明萬歷中建

關帝廟在卧龍街詳見府廟

節婦祠在舊府治基

本朝雍正元年

詔建七年卽甘露廢寺改爲之門坊未立今基址侵爲義學旁

租房

元和縣合祭

醫王廟在清真觀醫學舊稱三皇廟在流化坊

卽舊吳縣治地隸吳縣祀

伏羲神農黃帝

本朝康熙二十八年改建今所三十年知府盧騰龍請以儼貸

季岐伯伯高鬼與區少俞少師雷公配改今名

天妃宮在郡北中路橋

盧志卽宋章棗家廟子孫因權要侵其地遂獻于官以建廟而移家廟於側

宋宣和五年賜廟額順濟紹興二十六年封靈惠夫人賜廟

額靈應三十年封靈惠昭應夫人乾道二年封靈惠昭應崇

福夫人淳熙十一年封靈惠昭應崇福美利夫人紹熙三年

封靈惠妃慶元四年封靈惠助順妃嘉定元年封靈惠助順

顯衛妃十一年封靈惠助順顯衛英烈妃嘉熙三年封靈惠

助順嘉應英烈妃寶祐二年封助順嘉應英烈協正妃三年

封靈惠助順嘉應慈濟妃四年封靈惠協正嘉應慈濟妃是

年又封靈惠協正嘉應善慶妃景定三年封靈惠顯濟嘉應

善慶妃元世祖至元十八年封護國明著天妃尋加顯佑號

大德三年封輔聖庇民天妃延祐中封護國庇民廣濟明著

天妃天歷二年加靈感助順福惠徽烈號賜廟額靈慈明洪武中封昭孝純正孚濟感應聖妣永樂七年封護國庇民妙靈詔應弘仁普濟天妃

本朝康熙十九年平定臺灣神湧潮濟師

敕封護國庇民妙靈昭應弘仁普濟天妃五十九年檢討海寶

編修郡人徐葆光冊封中山王還

朝奏請歲春秋致祭

盧志神莆田人姓林氏宋元祐以來廟食于閩累著靈驗元時每歲漕運經涉海洋當驚風怒濤倉卒無措之際檝工柁師叫號靈妃延頸俟命忽檣桅之巔有烽炬棲集則神至無虞矣

一在夏駕橋南三山會館一在夏駕橋東漳州會館一在鴈宕邨泉州會館一在王家巷寧波會館一在新巷北邵武會館一在

姚家街興化會館一在上津橋東潮州會館一在上津橋江州會館一在南城下寧國會館一在白蓮橋內延建會館

靈濟廟祀白龍神在陽山澄照寺初廟在山巔宋太平興國中移建於山南曹巷熙寧九年又遷於此紹興二十九年賜今

額乾道四年封龍母為顯應夫人後又屢封龍神為忠烈昭應廣惠靈豐公龍母為顯正孚順聖善妃元元貞開重修明

仍額靈濟弘治三年重修

宋胡偉白龍廟碑中吳古澤國也當春夏之交陰晴多不常鄉民以

是卜白龍之歸相傳東晉隆安中繆氏女因出歸途日暮天欲雨忽遇老人詢姓氏居所願假辟雨待旦而前語竟失老人所在已而有娠父母惡而逐之乞食於鄰踰年產一肉塊棄之水中忽焉塊破化為白龍宛延母前若有所告者母驚仆地須臾雷電晦冥風雨交作良久開霽則白龍天矯於山椒俄頃復還產所視母已死乃飛騰而去鄉民厚葬其母於

此今所謂龍冢是也自是憑巫以求立祠且言所產白龍已廟食長沙於是鄉民建龍母廟於山顛每歲三月十有八日龍歸省母前期旬日天氣肅寒四山煙雨乍晴復合正誕之辰龍必見形或長身身尊丈隱顯於眾山之上或小如蜥蜴依於廟貌暴風雷雨澍溝號木則其驗也昔廬山僧祖照嘗述其本原於壁廟宇自國初由山顛遷於山南之曹巷熙寧丙辰再遷於今所建炎中主寺僧覺明禪師又葺今祠紹興己卯四月帥曹以祈雨有應奏賜靈濟廟乾道戊子二月郡守姚公憲奏封龍母顯應夫人偉聞歲在庚辰三月三日客有艤舟南徐徐者有白衣老人附舟云吾至自長沙欲省親於蘇之陽山願以錢十緡僦直而先酬其半舟師從之辰已聞解維至夜僅行數十里老人怒其緩自為操舟舟師因共卧運明蹴之使與舟已近岸距南徐三百六十里矣老人翩然登岸徐步入廟舟師隨之寂無形影顧龍母帳前僦舟半直在焉既而雷雨大作舟師問寺僧始知龍歸也乃輟餘直飯僧而去長沙廟食誕辰省母至此益驗矣乃為迎享送神詩遺諸鄉民俾歌以祀焉其辭曰春花落兮春服成雨霏霏兮烟冥冥秧針綠兮蛙部鳴風蕭蕭兮林有秋聲縞為旌兮素為葆山之巔兮雲之杪雷車轟兮電光掃龍將歸兮非暮即蚤簫管沸兮鼙鼓喧肴羞苾兮酒醴潔蠲盼蠻兮精意傳巖薦

享兮屬袂摩肩歲有常兮應斯至人與神兮情何異嬰兒慕兮綵服戲母子樂兮融融洩洩吳沃壤兮千里平勤稼穡兮勞農氓曰雨曰暘兮神有靈願垂陰相兮應其誠倏忽萬里兮姑少憩酌獻盡禮兮斯終遐惠年登穀熟兮益虔祀事自今以始兮千斯秋而萬斯歲元胡應白龍祠記吳城西三十里陽山之麓為澄照寺寺故有白龍祠宋屢封忠烈昭應廣惠靈豐公龍母顯正孚順聖善如邦人奉事惟謹祠重建於宋紹定壬辰歲久圯毀勢凜凜欲壓寺僧守淳哀積衣貲復募樂施者僅營兩廡重繪左右壁殿役最鉅力未易就會參政張公謁祠下慨然曰吾歲奉朝命凡餉餽從東南者航海以達於京風恬浪平舟楫如砥迄濟登茲匪神疇相是山龍所載育而廟貌弗修非闕歟乃捐金出粟掄材簡匠殿廬階祀像設導衛咸徹而新之丹碧髹堊瓦巖甃疊視昔為侈更以田四十餘畝給祠事所以致力於神者至矣噫萬生總總孰迪而康靡陽愆克靡潦淫汨敷為氣和繫是神靈惟參政公誠與神孚克隆斯舉而淳師又能善信於人皆可書也予先墓去寺而近知祠宇興復為詳師以記屬義弗得辭初神游陽山發祥而著跡陳山關靈湖湘間具前後二記不書公名瑄為資善大夫江西等處行中書省參知政事祠之修始元貞乙未越明年丙申告成距始建甲子踰一周云明吳寬

重修陽山白龍神廟記陽山在吳城西北二十里而近視他山特高且大蓋吳之鎮也相傳有白龍產其下其說載於郡志甚異其神秩於祀典廟而事之亦甚久矣夫山之高大者能出雲雨必有神司之而龍之為物用雲雨以為靈者也使依得其地則足以致其用昭其靈而山得龍以依其澤博其勢亦尊而他山固不足以擬之矣陝右孟公以監察御史擢守蘇州明年為弘治庚戌入夏不雨公以農事為憂曰國家糧餉多仰給是郡使禾槁不收非惟民無以為食其何以免徵斂之苦乎乃七月朔齋沐已率僚屬行禱廟中未至而雨遠近沾足民皆歡然頌公公曰此神之賜也其何以為報哉顧其廟傾圮弗修者六十年於此若舊有獻殿特存其址而已乃具材用徵工役擇人董治未及數月而功告成適長洲丞魯聰以公事上京師俾持書來請文為記夫洪範庶徵曰肅時雨若無所為禱者春秋始書大雩公羊傳曰大雩者旱祭也至漢世令郡國上雨澤旱則公卿官長以次行雩禮則有所謂禱矣洪範之說其身之修本也春秋之說其事之舉末也不修其身而徒舉其事雖禱於神神將不降其居不歆其祀尚何有雨之應哉故於廟之成因書公之所以感乎神者必有其道則後之禱於此者其亦知所謹哉明高啟白龍廟迎送神曲薦芳兮奠醑斲冰為梁兮葺荷以為宇神不來

兮孰與處空山愀兮暮多雨渺吾望兮瀟湘雲冥冥兮水茫茫有美人兮在堂盍歸來兮故鄉導赤鯉兮從元鼉冷風回兮水驚波儼靈旗兮來下巫撫節兮安歌安歌兮未極倏回軒兮山之側南有淵兮北有湫神不留兮我心憂願歲來兮惠我秋

言子祠在元一崙干將坊初祀於學道書院明嘉靖中廢詳見書院

萬歷十二年申文定公時行重建今所

本朝乾隆二年給帑修

鄭子祠在吉由巷祀先賢國

徐孺子祠在利二崙祀漢徵士穉

陸內史祠在相城益地鄉祀晉大將軍右司馬雲雲為郡人因

督糧過吳婁地見歲祲以所督糧盡賑饑民雲後遇害民感

其惠以衣冠葬此立祠祀之成化中里人沈貞吉重建

陸宣公祠祀唐宰相贄在齊門外六里相傳公卒於忠州歸葬

於蘇其地至今稱陸墓墓傍有塔院明吏部尚書吳一鵬嘗

塑公像其中歲久為僧所鬻嘉靖十一年工部郎中張問之

來吳檄縣追復之仍增拓祠宇修設像位題其堂曰仰賢朱

希周記今復圯移建五龍堂巷

顧文敬公祠在張果老巷祀唐兵部尚書少連

沈戎公祠在青龍橋祀唐吏部尚書傅師今圯廢

縣尉談戡祠見縣學

徐文端公祠在府學東祀宋蘇州通判爽忠懿公師閔延康殿

學士鑄忠烈公謙仁孝公道附

蘇學士祠在滄浪亭南祀宋集賢殿學士舜欽

本朝康熙三十二年巡撫都御史宋犖建

胡安定先生祠在正二畝章家橋巷祀宋蘇湖教授瑗一見府

學

滕公祠在文一畝草橋北祀宋龍圖閣學士章敏公甫工部侍

郎忠節公茂實京西路轉運副使忠惠公膺明戶部尚書忠

愍公德懋明敕建

本朝乾隆九年給帑修忠節公舊有祠在元和道院南

地隸吳縣

崇禎閒建張國維記今廢

張明公祠在亨三旨報恩寺東祠宋橫渠先生載父殿中丞迪
祀於寢又公裔孫明張應奎聘烈女沈氏亦耐祀明萬歷三
十六年建

本朝順治十三年裔孫提學僉事能鱗重修

鄒公祠在卧龍街樂橋北祀宋吏部侍郎浩

朱司農祠在干將坊東祀宋司農少卿壽昌

太師斬國韓忠武王廟在南禪寺左俗稱韓家園初在吳縣靈

巖山西麓紹興二十年敕葬於此因立廟祀之後廢明成化

十年知府邱霽奏入祀典而祭無定所弘治七年知府史簡

以王舊宅在寺傍就寺中為位而祭十一年知府曹鳳復立

廟靈巖山尋廢嘉靖二年知府胡纘宗仍立廟寺左黃省曾

記

本朝順治十六年為寺僧所毀教授程邑重建

明張習韓斬王廟記一人之忠

義一代之忠義也千古之忠義也忠義本於心人同是心者
同是好也烏有彼此久暫之異哉我朝列聖發德音曰忠臣
曰義士每舉以褒崇之不以古今為間曩蘇州知府邱侯霽
以宋名將忠武韓斬王上聞謂王當靖康建炎間屢立戰功
捍衛王室維時駐蹕臨安而三吳實在畿內民獲脫虎口而
弗致肝腦塗地者惟王是賴也王後薨葬於吳靈巖山麓止
存穹碑而荒涼殊甚雖有裔孫居傍微若一綫焉恒缺據
禮勞以衛民於法當祭矧民至今感之宜每歲為一祭以
應明詔以激忠義制曰可然祭無常所或在山寺或在城結
茨而祭如是者三十稔矣今知府曹侯鳳側然於懷以為事
神報功吾民牧事也擬於王墓立廟以為棲神兼得酒掃松
楸免於草莽白於巡按御史劉公丙委同知林侯廷獻董其
事侯相地於豕南為構中堂四楹奉神主前堂四楹列祭儀
有寢以安齋宿有廡以虔庖宰繚以周垣闢以儀門費枌丹

聖孔曼且碩經始於弘治戊午如月丁丑至仲秋之朏落其成於是郡之士庶靡不相慶幸以為順其所望也爰授習志諸石嘗諗王風骨偉岸日瞬如電蚤抱忠義見國步艱險即躍然應募而起始攻夏城斬關而入斷敵將首擲之埤下掃平南北羣盜既而徽欽北狩高宗渡南而華風幾淪敵禍方熾神器殆非宋有王於是時以數千殘卒與兀朮四十萬衆小戰百餘大戰數十自黃天蕩挫之北道誓蹙金人而滅之克復中原迎回二帝以竭其忠義志氣而後已奈何主蔽奸相弗圖周漢之中興忘讐忍恥自甘瘡痍其生民棄捐其土地使智勇元勳置而弗用齟齬偃蹇徒老而斃所謂自壞爾萬里長城惜哉豈惟王之不幸實宋之不幸也吁以一人之身為國家用否而繫天下安危可見忠義之在斯人與天地之元氣相為周流日月同其光明山川同其流峙草木昆蟲同其生息暢達有不可掩焉者故前後大夫不私於吾郡而揚於大廷暴之天下聖天子於前代之忠義錫之寵光載之祀典俾三百年之隱伏煥一新於今日垂衍千萬世而弗泯曠蕩之恩為何如哉習亦蘇之齊民同一感仰於王者故忘其庸謏謹述如右

朱文公祠在祥符寺巷

呂東萊祠在亨二首圓妙觀前

本朝康熙間建

靈惠祠在舊子城基西祀宋常熟孝子周容

皇甫汭長洲志長洲舊有孝子祠靈

應昭著禱者繼踵廟庭隘不能容成化七年土人王英募諸里中得蘇州衛千戶陳俊割地以廣其址廟制始備旁浚井上造轆轤病者汲井投紫蘇煎飲即愈廟之前建亭樹碑學士吳寬為記詳見常熟縣明吳寬周孝子廟記姑蘇城東南隅有周孝子廟廟始建於常熟在宋乾道間邑人周容奉母朱氏有至行人稱周孝子且勇於為義見罹患難者拯拔之恒恐後既歿一日降於其家以己為神告其母且曰兒願為國効力以保祐鄉里後果如其言終歲民無災患遂相與廟事之其後淮南大疫云有往施紫蘇湯者全活者衆淮人渡江酬之偶見廟貌始知為神事傳民間凡病者禱訖汲水投紫蘇煎飲即瘥既七十餘年進士趙必錡因具其事又以除蝗驅虎救水旱扞寇盜顯跡上於官朝廷特賜廟額秩於祀典若蘇城有廟歲月已遠莫考其創建之由豈常熟為蘇屬邑郡中亦冀其神貺波及以事之歟近景泰甲戌郡中大雪

民飢而疫作相枕籍死禱者取水煎飲如法亦多獲生民益
神之自是凡有所求爭趨廟下每旦庭廡如市顧其廟既卑
隘禱者益多至無所容足旁有王英者自其父謙以來再世
守廟以精勤稱謀欲改建而不敢專其事則與里正言於縣
於府而蘇衛千戶陳俊更割地以廣其址廟故西向始易以
南爽塏端正以至像設器用亦無不備自昔吳越多淫祠狄
梁公悉斥去之今孝子爲人雖非若古之法施於民也然使
悖逆者則愧而改行雖非若古之禦大災大患也然使疾疹
者祈之而獲福廟而祀之豈不宜哉噫梁公旣往吳俗彌盛
其尤者家自爲廟祀非其鬼往往到羊豕以大享之其歌謳
歡笑俯仰跪起類乎生人之謙而卜筮巫祝之徒假以獲利
者皆是會謂孝子肯享其祀乎而人亦敢以其祀祀孝子乎
予嘉孝子有補於世教也有益於
民命也有合於祀典也於是乎記

昭澤侯祠在閩門方基

舊志神姓宋名恭字道中任宋禮部尚書在宋已有昭澤侯之封明太祖兵下

蘇州過義濟洪值風濤見一舟順流至上揚赤幟書一在城

宋昭澤侯波浪頓息登極後封鎮義濟洪建祠祀之

中報恩寺西

章莊敏公祠在報恩寺東卽章太師家廟公名棗涇源禦夏寇

有功徽宗賜廟懷德軍額曰忠烈嘉定末其孫請立於此今

爲天妃廟

劉提舉祠在干將坊祀宋平江權茶提舉順之

劉靖節祠在元一崙干將坊祀明舉人政萬歷初建今圯移祀

提舉祠中

俞太保祠在卧龍街元二崙祀明刑部尚書士悅

沙貞惠公祠在九都采雲壘祀明太醫福一明洪熙中敕建八

世孫諸生舜臣附

公之先汴人洪武初徵入醫院六年京師大疫命設局療治全活無算賜賚甚厚卒

葬於此與方正學交爲作傳洪熙中追諡建祠舜臣當周忠介公被逮時與王節等面叱撫按褫其衿事母以孝聞

韓襄毅公祠在郡學東地一畝祀明兩廣總制右都御史雍嘉靖二十三年巡按御史呂光洵建自爲記

朱中丞祠見縣學

瓜涇徐公祠在地一畝滄浪亭南祀明山東巡撫都御史源子廣東參政禎祔

袁氏六俊祠在圓妙觀東祀明臨江通判表國子生襲禮部員外郎袁文學襲廣西提學僉事袁貢士裘兄弟六人皆以文行知名吳中稱六俊

本朝康熙二十五年建彭瓏記三十六年以裘子提學副使尊尼裘子陝西按察使年裘孫孝介先生麟祔

王仁孝先生祠在卧龍街關帝廟右祀明徵國子博士少湖先生敬臣祭酒陳仁錫建伍袁萃記

皇甫公祠無考

禮賢祠舊在支硎山今移閭邱坊巷祀明章莊愍公溢

矯文獻祠在湯山祀明參政順今圯廢

顧御史祠在卧龍街祀明行人其國

葉公祠在徐貴子橋祀明禮科給事中初春

本朝康熙二十七年建葉燮記

徐文靖公祠見縣學

育嬰遺愛祠在圓妙觀西偏雷尊殿西

本朝康熙中郡人蔣德峻等創育嬰局於此乾隆九年改為祠

祀巡撫都御史慕天顏宋犖布政使丁思孔劉殿衡楊朝麟

知府高暉郡人顧天朗蔣維城蔣德峻許定升許王儼許蚪

張遇恩顧溥黃璠汪彬呂垣王炎午周陳範朱澄施鏞興陳

紹美馬守強杜鏞於啟禮巡撫陳大受記

于清端公祠在金丹橋西天王堂祀

本朝兩江總督戚龍一見府學

馬清恪公祠在舊府治基東天王堂祀

本朝巡撫都御史祐

宋公祠在滄浪亭祀

本朝巡撫都御史犖

彭侍講祠見縣學

已上祀典

蕭王廟在卧龍街樂橋上相傳橋近市曹戮人處以蕭何制律

故祀之

漢任使君祠 姑蘇志云祀唐刺史任昭慶也在天慶觀即今之

歷中觀燬其像獨存又云嘗考漢任延為會稽都尉聘高尚

勉孝行周窮急多有善政而民祀之此或是延祠而誤云爾

晉謝太傅安 舊在吳縣乾隆九年裔孫宏綸移建至德廟西

楊和王廟在城集義鄉孝廉里祀宋將存中 存中有別館居此因祀之

五塢先生祠在春和坊西祀明陝西參議盧襄隆慶四年建一
在吳縣越來溪上劉鳳記

五賢侯祠在卧龍街關帝廟左祀明知縣鄧凌霄承燠胡士
容韓原善葉成章

舒御史祠見縣學

五龍堂在縣東南唐貞元中建李紳記宋淳熙開賜額靈濟廟
皇甫汭長洲志宋淳熙十年郡守耿秉以久旱齋禱祈雨越
三日有小龍如蜥蜴見於神位前香案果飭上蜿蜒不去秉
與約三日內雨當奏請廟額明日大雨事聞詔賜靈濟自是
凡遇水旱守官投鐵牌於祠前潭中必獲響應紹熙四年敕
封第一東靈侯第二西成侯第三中應侯第四南平侯第五
北寧侯今堂中肖五侯像吳中疾疫者禱之大有靈驗俗又
相傳十八日為神生日先期賽社結綺為亭一在晉寧坊名
旗鼓喧闐舉神徧走街巷以祈禳災疫焉

曰樂營堂

靈官廟在葑門外滅渡橋北一名靈順行祠宋紹興閒建元至

正末燬明初重建

金龍四大王廟在閶門北濠一在清風亭南

地隸吳縣

元壇廟在圓妙觀前一在織里橋南一在義慈巷

姑蘇志神姓趙名朗字公

明

水仙廟在府治東南一在城西閶門外鴈宕邨南一在洞庭東

山姑蘇志古蒼龍堂神即柳毅也今為上元鄉土地頗著靈異

總管廟在蘇臺鄉真豐里一在白蓮橋西一在盤門外仙塘橋

下姑蘇志神汴人姓金初有二十相公名和隨駕南渡僑於吳沒而為神其子曰細第八為太尉者理宗朝嘗著靈異

遂封靈祐侯靈祐之子名昌第十四初封總管總管之子曰元七總管元七至正間陰翊海運初皆封為總管再進封昌為洪濟侯元七又一祠祀元王積翁亦名總管

顯應行祠一名李王廟在葑門內宋咸淳中創姑蘇志神姓李名祿長興童莊

人累封福濟顯忠等號進侯爵吳城內外多有之或云即名將李顯忠盧志又載宋理宗時神見夢全吳興一城事詳見常熟縣

清源妙道真君廟在葑門內西營一在婁門內平江路皇甫汈長洲志

神姓趙名昱灌州人也幼從異人學仙大業中召為嘉州守會握劍入江斬蛟等隱去不知所終後嘉州江水泛溢為害神顯蹟平之星幢羽葆出入江波開當時神其事累封神勇大將軍赤城王宋真宗時進今封邑中患瘍者禱之輒應相傳六月二十四日為神生辰傾城男女奔赴以祈靈貺又見昭文縣

金天王廟在城東南隅楊和王賜第園中盧志昔人於廟旁土中掘得斷碑有金天

王三大字又有沈傳師兼御史大夫秘書鄉貢進士十餘字字徑二寸許按唐初封華山神為金天王而傳師蘇人也故附會祀之縣志云後為正覺寺廟久廢

燕國夫人廟在府治東南燕家橋吳孫權乳母陳夫人捨宅為

通元寺後唐同光中移今所今開元寺亦有其祠盧志淳祐中提刑胡

穎拓四酒務隙地為射圃鑿河見古墓得石函上刻燕國夫人首級六篆字遽命碎之舊傳酒務本夫人宅

夏侯神廟在夏侯橋側宋皇祐四年建明正德八年里人沈杰

縣丞何懋重修

已上舊祠及土俗所祀

元和縣社稷壇統祭於府壇

風雲雷雨境內山川城隍神壇統祭於府壇

先農壇在仁一畝相王巷南

本朝雍正五年

敕建

厲壇附祭郡厲壇

城隍廟在蕭家巷

本朝雍正四年卽土穀神張明廟改建

關帝廟在地四畝西街華嚴寺旁建置無考

本朝雍正七年重建

闕里分祠在子城基西文一畝祀

先師暨

肇聖裕聖詒聖昌聖啟聖五王

本朝雍正二年建乾隆四年給帑修

按自宋景祐立學以來天下州縣皆廟祀

至聖闕里林廟公世守之衢支並置五經博士典禮可謂備

矣孔氏之支庶散處他方者焉得又立廟以祀哉禮諸

侯不敢祖天子大夫不敢祖諸侯設有附會是瀆且誣

也故凡先賢及歷代名臣其非蘇產與嘗官於斯者或

因子孫在官而請朝命以設者揆之祭法皆宜在所損

朱張祠在利一畝至行坊

本朝乾隆二年給帑修

臨濮侯祠在利一畝祀先賢施之常舊在閭門外施家巷久廢
國初移建太平橋南雍正十三年改建今所

亞聖孟子祠舊名鄒國公祠在城東顧家橋五十三世孫孟潼
以祖信安王府請於有司改立爲祠裔孫文龍守之明萬曆
四十四年移建東禪寺西寢殿祀孟母

本朝康熙中督糧道劉鼎修乾隆二年給帑重修

朱氏祠在至行坊祀漢尚書益州刺史穆唐太子洗馬孝友先
生仁軌

本朝乾隆二年給帑修

二戴祠在虎邱東祀漢信都太傅德九江博士聖

本朝康熙二十六年建

歸宣公祠在仁三畝給諫坊祀唐兵部尚書崇敬子工部尚書
憲公登祔又公裔孫文達妻旌表節婦陳氏亦祔祀焉

本朝康熙中巡撫都御史韓世琦修

甫里先生祠在甫里保聖寺之白蓮院祀唐陸處士龜蒙卽其
宅或云卒後就葬其旁廟食於此宋嘉定十七年錢塘龔時

備別建祠於左

齊東野語白蓮寺魯望祠堂其像設皆當時
物咸淳中有盛氏子醉仆其像於水滿腹皆

平生詩文彙也知府倪普抵盛
罪更爲塑像腹彙不可復得矣元至正閒縣尹馬玉麟重建

先是至順閒奏以龜蒙故居爲書院後遷郡城詳見書院

宿甫里先生碑銘君子之無所失道與世而汗隆聖人之不
滯於物因時而遷徙達則奮庸而兼濟否則懷默而獨善堯

舜許由昔賢標一揆之論禹稷顏子先民有同道之說繼世而作易地則然自風流之聿頽固先靈之不屬中古以降作者實繁舊史所存孤風可見咸能自潔身累脫去世紛耕巖石以相高蹈山林而不返語其玉立之節始得而云體夫道勝之韻蓋亦有幾若乃揖紛亂而高謝標耿介而長往漁釣一壑寄傲無何之鄉鼓吹六經圖芳不朽之事非夫高雅淑靈粹溫簡正疇可以議夫是矣先生陸氏諱龜蒙字魯望笠澤之幽居者也吐崇嶽之符俾生民之俊溫其如玉而不加雕琢淵乎似道而無所澄撓神茂初學聲冠當世屬上行標季天宇驛騷俎豆委而不收干戈尋而未已先生歎深鳳鳥志劇鴻冥刻銘函谷之關鼓柁滄浪之水棄去驕君之餌謝絕畏友之方於是上會稽探禹穴由臨安訪仙室歸長洲茂苑之下樂松江甫里之勝乃歎日時無明王孰能宗子施於有政是亦為政退而賦考槃之詩且有終焉之計雜草開徑為臨江之居剪地作堂傲在鄒之宅南直岍峯之色西帶重湖之光孤雲無心白鳥可狎道素自處物累不嬰好事之流或載酒而相訪雅游之子時款關而請見戶外之屢常滿席閒之丈屢啟稻田一廛歲供薪水之費魚陂數頃日充庖膾之事至若金樞之月靜夜赤城之霞啟旦花瀨不遠蘋風甚快先生則必飾犂牛之乘駕白鵠之舫招來僧社之舊申命

朋簪之盍泛覽節物從容談燕筆床硯格靜置於左右琴歌酒賦相繼以晝夜擊銅鉢而賦詩指石鼎而聯句清溪之內其復何窮白雪之倡其和益寡飄然聲利之表自適仁智之樂真所謂風塵之外物天地之逸民者也加以癖好聚書本皆有副得以傳寫則烏闌不計其費躬加校正則雞距未嘗去手亡一簪而不恤以百城而自喜雖張華海內之秘班嗣禁中之副無以過也由是富擁多文優入聖域紬六經之妙論泛九家之清流摘發異聞多黃香之不見沈研精義皆郭璞之未詳此又稽古之宗師博物之淵藪也若夫言不詭聖志在拂世英辭闢楊朱之塵高論攻墨翟之守潤色夫子之際煥乎有章潛心大業之中卓然不類斯又三代之遺英萬世之先覺也自頃元和而下風什淪喪多哇之響甚喧大雅之作幾墜先生收五際之長波駕四始之高蹈綜制萬變入道奧而惟深刻雕衆形等天機之不宰微言之緒旣墜正始之音復聞時皮公日休以高文大筆為世元儒先生幅巾過從一面如舊相與文酒之閒坐忘形骸之外凡所賡唱溢於几筵莫不研幾深以繹志叩虛寂以成韻天才艷發縟體交變裏蹄之性百鍊而不耗大韻之音九變而復雅居然嗣響蔚於中與其命世傑出之雄乎昔子山遘閔辭多主於悲哀韓非遭亂書頗露於孤憤屈平怨刺託方物以寄懷虞卿窮

愁慨詩書而見志何自待之未厚將不遇之所興竊况淵高
曾未髣髴密而不雨嗟乎西郊之雲瑞非其時異哉東魯之
獸至於青編紀素尚之節鏤板昭炳蔚之文雖與日月爭光
金石共盡可也宿仰企前徽積有年籥經涂所出舊址存焉
巋然靈光鞠為茂草愁交照之不接悼園秀之無聞亦猶歷
高唐者想綿駒之謳過夷門者感侯生之事蹈揚盛德其庶
幾乎銘曰仰以觀文少微之位含德葆光淪精毓粹猗歟先
生鍾厥靈氣郁哉懿文倬然上智五代尋戈三靈塞霧鶴在
衛軒豺盈漢路衰鳳成歌冥鴻曷慕長洲苑下松陵水邊內
樂名教中有聖賢擁書萬卷捲藻干篇江山豈助造化無權
名理之言有補於世清亮之風未墜於地壤樹俄空隴書不
至清暉渺邈幽靈潛翳鞠草實繁柅車增欵講樹已凋琴臺
久墜茫茫太素英魄兮何歸杳杳終古香名兮獨飛明高啟
謁甫里先生祠衣冠寂寞半塵絲想見江湖獨卧時遁跡虛
煩明主詔感懷猶賦散人詩釣魚船去雲迷浦鬪鴨闌空草
滿池芳藻一杯誰為奠鼓聲只到水神祠文徵明過甫里訪
陸天隨故祠一龕香火白蓮宮古社猶題甫里翁坐挹高風
千載上依然舊宅五湖東雨荒杞菊流螢度月滿陂塘鬪鴨
空故草已隨塵土化
空瞻遺像寂寥中

濂溪周先生祠在半十九都正一 晷弦歌里舊在吳縣胥臺鄉

宋嘉定間先生四世孫和州觀察使興裔駐劄平江奏建後

遭兵火其裔孫文英南老屢復而卒廢明正統元年裔孫浦

淵等始遷於家在萬壽寺西故以濂溪名坊有崇本堂王直

記萬歷四十八年移建今所興裔祔 明高啟咏周元公祠逸
哉宋周子襟懷迥無塵

精微闡太極默契心自純遠慕羲皇畫示我羲皇人道既倡
東南闡然韜吾真祠毀罹兵燹祀廢邁時屯臨風一俯仰恍
惚如
陽春

本朝乾隆九年給帑修

二程子祠在虎邱東麓舊在盤門內 地隸吳縣 紹興二十六年伊川

從子沂知崑山縣因光祿程師孟宅建元季燬明成化二十

二年重建

本朝順治十七年裔孫府教授邑移建仁壽里康熙九年裔孫文彙移建今所祀司農珣於寢文簡公大昌雲莊先生智祔乾隆七年增祀明禮部侍郎敏政

本朝工部侍郎文彛孝子大儒文煥

樂圃先生祠在地三畝祀宋蘇州教授朱長文元符元年范忠宣公純仁建寶祐三年賜額樂圃書院元燬明初重建

本朝乾隆二年給帑修

朱忠節祠在樂圃先生祠旁祀宋海鹽尉良

楊文靖公祠在虎邱二山門外亦名道南書院祀宋龜山先生

時明兵部尚書莊簡公成解元忠文先生廷樞祔

本朝康熙五十八年布政使楊朝麟建乾隆二年給帑修莊簡

公舊有祠在黃牛坊橋巷明崇禎五年建子端孝先生大滌

祔今合祀於此

尹和靖先生祠在虎邱雲巖寺西祀宋肅公焯嘉定中知府陳

芾卽先生所嘗讀書處建九年郡人孟猷等移於上方通幽

軒之南提舉吳格割公田四十畝為歲修費後為書院元明

移置詳見書院嘉靖十七年吳縣知縣汪且仍建祠於故址

左有讀書臺

宋黃榦新建尹先生祠記和靖尹先生寓居平江府虎邱西菴榜曰三畏齋去之七十有五年

郡守直秘閣陳君芾通守太學博士丁君焞始度菴空地為屋繪先生像祠焉尊前賢勵後學也先生諱焯洛陽人年二

十師伊川程子舉闈策士議誅元祐黨人不荅遂棄舉子業
靖康初以布衣召不至詔褒為和靖處士洛陽陷家穢焉先
生死復蘇竄長安山谷中逆豫以禮聘溺水逃去展轉蜀道
累年紹興初以崇政殿說書召凡二十辭八年始入見除秘
書郎明年遷太常少卿權禮部侍郎每遷輒力辭其冬除徽
猷閣待制提舉萬壽觀辭不已遂奉外祠即虎邱以居年已
七十矣後二年竟沒於會稽之寓舍先生所寓於世如此蓋
嘗考先生之所學篤於踐行不為虛語未嘗求人之知人亦
莫能窺其所蘊今其可見者經帷進講門人所記錄耳唯即
其所寓於世者觀其所處然後知先生之於道卓乎不可及
矣利害者人心之私義理者道心之公公私之間迭為勝負
一取一舍而賢不肖可知也至於歷險難之極而不變處貴
顯之驟而不动抱仁戴義終其身而不悔非盛德能若是乎
義理充於中則禍福成敗榮辱得失膠轕萬變日陳於前而
此心自若也程子之門從游之士皆宏博俊偉極天下之選
而於先生亟稱之其察之審矣顏淵退然如愚而夫子稱之
亦曰簞瓢陋巷不改其樂又曰庶乎屢空然則先生者程門
之顏氏歟里巷小人顛冥於利害之塗不足道學士大夫則
知義理矣臨利害毛髮許棄其所守者可歎也聞先生之風
得無少愧有志於道者亦可以自勉歟二君為是祠有補於

名教大矣故述其躬行之大節以示學者庶幾驗之於身而
得先生之道云黃士毅重遷祠堂記平江府虎邱西菴和靖
尹公先生祠者嘉定甲戌今軍器少監丁公焞通守吾邦之
所創也初在山之西北隅後二年貳卿孟公猷聞有殯在西
階之上甚懼非所以祓不祥而致蠲祀之誠者告於刑獄使
者柴公中行乃屬長洲丞趙君崇仰即上方通幽之軒南闢
地而遷焉蓋先生寓居之所也知府事沈公俾悉資其役為
堂三間西向羣山前列環隴近護老木修竹交闕左右高明
靚深稱祀如昔甫成而柴公以名去王公涪繼之復摹先生
晚歲片紙手書聖賢格言五千餘字刊置兩序常平使者吳
公格割公田四十六畝俾任菴者為增葺費孟公以始創遠
遷蓋有以示來者命士毅書之士毅因竊慨念昔登朱子之
門獲聞先生之學嚴於持守之本在此用力之真體驗之熟
復發主一無適之旨至講說而不踐行則為虛語問答而少
差失則至誤人與夫未至於磨不磷涅不淄則不可如聖人
之見南子者類皆務於簡實而戒謹恐懼之意隱然於其間
未嘗不三復警省是皆持守之功也蓋持守則心存心存則
其言斯訥其行斯察有不期然而然者於是深歎夫周程之
所以以上續孔孟者至於朱子燦如日星有目咸覩先後本末
區別在前大小精粗各有攸屬學者於此不患講習之不能

明所患講習之易明而忘持守之為本耳則嘗推明先生之學以勵後進今茲祠事仰止遺像如親炙之必求先生之學而學焉是乃興起之方豈曰小補之哉此又其所可書之大者遂不獲辭既次其畧輒附所聞如此然自先生來居積七十有五年未有表其事而出之者而二三年閒其役再舉始克就緒則感夫事之難成而俾終弗壞焉以興起於無窮者又有待於後之君子也先生居之歲月出處之大致已詳於黃侯榦之前記是役也始於四月甲午而訖於六月庚戌實丙子歲云

李延平先生祠在婁門外道觀街祀宋文靖公侗舊在縣治東

明永樂四年建後廢

本朝康熙二十八年改建今所

劉屏山先生祠在貞三畝李基巷祀宋文靖公子輦公六世孫

權茶提舉順之占籍於吳因建後廢

本朝康熙二十五年提學侍讀學士李振裕重建順之祠

武順王祠舊在唯亭今廢無考

忠烈祠在乘鯉坊正一畝即舊縣學基祀宋丞相信國公文天

祥舊在吳縣永豐倉西北明正德十年巡按御史謝琛奏建

賜額嘉靖二十年巡按御史饒天民改建今所萬歷間修

本朝康熙二十四年巡撫都御史湯斌以公裔孫明翰林待詔

徵明大學士文肅公震孟耐雍正七年乾隆二年先後給帑

修明王鏊文丞相廟碑忠義之在天下未嘗亡而宋世以身殉國能信大義于天下者視前代為獨盛而文丞相之死

尤偉且顯其許國之忠屢躓而奮百挫不回至于今愚夫稚子皆知其為烈也夫死一也有重于泰山或輕于鴻毛則所處者異耳是故非死之難處死為難若公可謂善處死也自古死國者非一然皆居其官死其職事也方元兵渡江詔徵

天下勤王無一人至者公于時出知遠州非有天下之責乃獨慨然獎率三軍毀其家以殉國其氣固已凜然蓋天下及挺身使元被執而逸流離開關山棲海竄卒達行在當是時宋蓋亡矣猶號召義旅克復州縣軍敗身執志在必死祈死不死卒致之燕雖元之君臣亦皆咨嘆其賢必欲生之不得卒得死柴市從容南向有若平時蓋成仁取義公志素定於中非若倉卒履變慷慨殺身之為此公之死所以獨異而其節尤偉且顯者讀其傳誦其詩悲其志想見其人於乎雖與日月爭光可也公之起則知平江常州受圍公遣兵援之會詔起入衛公去而平江旋送欵矣使公不去平江必能與常倚角常猶戰不屈公其有不能乎二州戮力勢或可支卽不能支亦當背城死戰元兵不敢長驅臨安得徐爲之備不致倉卒銜璧一旦猝而爲俘也其後公過吳門感念懷愴遺民間公至無不流涕者於此見公之倦倦於吳吳人之不能忘公也公既死燕京廬陵皆有祠而吳獨缺太僕少卿文君森其先自廬陵徙衡山自衡來吳蓋公之裔胄也子斗願以其地作廟世守其祀巡按御史謝君琛以聞詔可賜其廟曰忠烈有司春秋饗祀如禮正德十年夏廟成請予紀其事於石以詔來裔銘曰嘻吳故墟有魏新宮宮祀爲誰丞相信公元爲長虵吞噬中夏飲馬長江已無宋社公獨奮然率兵勤王

吾伸吾義焉知存亡崎嶇嶺海有死無二卒死於燕卓哉此氣公身可殺公志莫斂千萬斯年其氣烈烈撐拄乾坤昭揭日月唯忠唯義率土嚮之况茲吳門公所素治公治於吳不能百日公惠在吳終古不沒公裔公遺後復吳居作廟揭虔帝命曰俞綱常民彝弗渝弗墜饗祀千秋爲世臣礪本朝鄭敷教文信國公忠烈祠記有宋養士三百年國亡死事之臣甚烈文丞相信國公實首稱焉百世而下祀公於所生之鄉所死之地所經歷之境幾徧方域矣其敕建於吳中也自正德六年辛未始公昔勤王之師嘗開闔平江既係燕獄有集杜詩二百首如自作年譜其敘蘇州云予領兵赴闕時陳宜中歸永嘉留丞相夢炎當國夢炎意不相樂出子以制閩守平江尋以獨松事急趣還宿衛予行未幾姑蘇陷哀哉公蓋一日不能忘姑蘇而蘇州之人心百世不能忘公有以也其奉敕改建於學宮自嘉靖二十年辛丑長洲縣學既遷之後也公後人待詔公徵明書正氣歌於堂之壁生氣凜然惟公之學一歸於孔孟殺身成仁舍生取義以公衣帶中所藏立公位於孔氏之庭豈曰時會使然蓋亦至聖大賢精英有以相盪也自辛丑至萬歷乙卯歷七十餘年而祠宇日圯邑宰胡公士容謀於公後人孝廉震孟重修之後孝廉亦以狀元位至相國風節義概能繩其武云自乙卯至今庚戌又五

壇廟二

十餘年而傾圮者鞠為草莽矣其裔孫世光謀助於一時好義之人心則顧考功予咸實首倡之濱死以屬其後人而堂宇重新焉蓋予讀宋史至信國公事及井中心史所載文丞相序未嘗不骨顛魂搖有甚於謝翱之慟哭也公嘗謂大宋三百年宗廟社稷為賈似道一人所破壞於乎何後世似道接迹而如信國公者虛無人信國公之靈其必有恫乎不寧倍於昔日者乎祠之始建再建聞於朝重修也輸於官今幾幾興起於不振之子孫與夫好義之人心是可悲也已雖然今日而猶可興起也人心為足恃而我公日星河嶽之精英為不磨也夫明蓋文丞相祠漢朝冠蓋盡胡元窮海累臣抱獨冤請劍便須游下地結纓何處是中原青泥不能長弘血白浪空歸伍相魂斜日悲風柴市裏行人千古掩啼痕

謝文靖公祠在虎邱山祀宋進士愚山先生枋得今圯廢

四賢祠在虎邱白蓮池旁祀明夏忠靖公原吉周文襄公忱王

端毅公恕海忠介公瑞

陳公祠在懸橋巷祀明翰林檢討繼

周文襄公祠在半塘普濟橋祀明巡撫侍郎忱

本朝乾隆十年巡撫侍郎陳大受以廢祠改建自為記舊一在

虎邱法堂後一在吳縣寶林寺皆圯廢

陳大受改建周文襄公祠碑記自昔治吳

之有大德於民而又久於其任者無若明文襄周公初宣宗以江南通賦難理蘇州一郡至八百萬思得才力重臣往釐之公由越府長史超擢工部侍郎來蒞自宣德五年至景泰二年時逾廿載恩狹三吳前後治行彪炳史冊是宜建立專祠以隆報享乃初與夏王海三公合祀於虎邱近復傾圮無存春秋二仲無以妥侑明靈闕而不修後來者之責也余奉命撫吳慨慕前烈思展敬禮爰傲長元吳三縣令會勘故祠宇之可去者改建公祠於元和縣境之半塘普濟橋仍其舊貫加以丹雘厥功既成涓吉升主以祭咸謂是舉也昭典禮治輿情宜書之石以垂久遠余嘗詳考明史緬公之設施是時吳民困於官田之重賦又困於徵收之無法弊叢玩積莫可究詰公始至創平米法以均其耗立水次倉以使其收奏減官田浮租七十二萬餘石以蘇積困而後通計歲入所餘之米設濟農倉以備賑貨通有無一切公用咸取給焉自是終

公之任民不知凶荒兩稅未嘗逋負公之善政莫大於此其
他興革皆因時制宜記傳所載更僕難竟蓋公以經世之才
際有明全盛之時朝廷信任許以便宜行事言無不從而郡
守中又有賢能如况鍾者與之同心協力故能成此偉績迨
其末年奸民訐奏言路交彈皆以妄費罪公公去而戶部遂
括所積餘米為公賦儲備蕭然未幾吳中大饑道殣相望逋
課如故故民益思公不已在處尸祝史言小人見小利而樂紛
更成之難而壞之易如此可勝慨邪

國家重熙累洽恩覃海宇我
世宗憲皇帝特減蘇松賦額五十萬

今上御極盡免江南積逋至千萬吳民幸生
盛世視前明之橫征重斂苦樂懸殊矣然非公之請減酌蠲苦
心調劑當時之凋敝更不知何如况其良法美意至今猶有
存者公之澤不且垂之百世而未艾哉余不敏繼公之跡於
後之君子相與觀感興起以光祀典於弗替

陳中丞祠在丁香巷祀明左副都御史璠

吳文定公祠在天賜莊祀明禮部尙書寬

朱恭靖公祠舊在北濠今移虎邱二山門祀明吏部尙書希周

懷魯周公祠祀明巡撫都御史孔教舊在胥門驛北萬歷削建

後移虎邱二山門今圯移祀朱恭靖公祠

韓公祠在沙河塘亭四畝祀明禮部侍郎世能

顧太保祠在舊學前祀明太保兵部尙書其志

陳文莊公祠在虎邱望山橋祀明南京國子監祭酒仁錫初在

臥龍街關帝廟之右

本朝康熙十九年移建今所公崇禎三年宣詔過家置附郭田

三頃設義莊以贍族人
莊初在仁二畝歲出納亦於此
本朝汪琬陳文莊公祠碑

前明南京國子監祭酒贈詹事陳文莊公之沒也是為崇禎
七年閏十年其長君濟生獻公所著書於朝始予贈諡追錄

其子一人又一年復許建專祠以祀於是卜地建祠於府治
 卧龍街闕壯繆廟之右歲月且久有司時節往祀輒歎其密
 邇市闐湫隘不足以稱也乃謀遷於虎邱得民居若干楹間
 而更新之門廡壯麗堂寢崇闕其旁則餽食有所庖湏有廬
 又其旁則有廩有倉凡文莊公所置贍族義田若干頃及祭
 田若干畝其所得歲租悉出納於此蓋其地山川之雄秀林
 陸之亢爽烟雲竹木之靚深實稱神明所栖非故祠比工已
 告成次君濟慎復聚族謀曰維茲麗牲之碑闕焉無辭非所
 以妥先靈而示子姓也乃來謁琬為文琬自惟鄉曲晚進未
 及登公之堂而受其學願少而嘗從兩公子游倘復挂名碑
 尾附公以不朽固所願也遂不敢禮辭謹按劉念臺黃石齋
 兩先生所撰文莊公家傳備言公之在熹宗末也以講官負
 重望會逆奄魏忠賢父子昌功求給鐵券公當草詔辭忠賢
 屢遣使趣公公奮曰首可斷詔不可草由是觸忠賢怒與妖
 人孫文豸獄牽連及公竟削籍以歸數揚言欲殺公僅而得
 免嗟乎聞觀史所載宦官之禍無世蔑有殆未有如漢唐及
 前明之甚者也然而漢之亡也以十常侍唐之亡也以北司
 是直宦官與士大夫為難耳前明則不然君子小人襍然並
 立於朝日夜用門戶相傾軋而小人遂借刃於宦官以戕君
 子此其過在士大夫非專屬諸宦官也當是之時告郡被禍

最酷不幸而死則有周忠介忠毅兩公幸而生則有公與文
 文肅姚文毅三公夫兩周公之死非輕生也公與文姚之生
 非避死也皆天也天之死兩周公所以伸忠臣之節也其生
 公與文姚諸賢者所以養直臣之氣也假令諸賢悉畢命於
 銀鐺桁楊之下則國無人焉吾見夫靦顏蒙面噉九千歲之
 不已必至於策九錫策九錫之不已必至於勸進亦何所畏
 忌而弗敢為邪此公與諸賢之幸存係於前明宗社非小也
 晚故曰天也由今思之向之號為義子義孫者其威福勢燄
 非不盛且熾也曾幾何時而俱歸於斲盡泯滅雖下訖於婦
 人豎子亦往往戢手恣口指斥其姓氏以為詭厲而公與諸
 賢獨名在天壤能使言之太息聞之者興起然則君子小人
 其獲報於天者又孰為愈哉今且距公之沒逾五十年矣四
 方士庶往來虎邱者登其祠而拜瞻其祐主有不歛歔俯仰
 想見公之風聲氣烈徘徊不去者乎吾知其必無是也祠成
 於康熙十九年又三年琬始為之文至若公之述作已行於
 時其家世生卒之詳已見於劉黃兩先生所撰者槩不復詮
 次云公諱仁錫字明卿世居長洲天啟壬戌科進士第三人
 由編修歷官南祭酒別自號芝臺學者稱芝臺先生附陳仁
 錫義田記世有名美而實謬者義田一事也生則高下任意
 沒而子孫輪管因緣為利以號於族曰義其孰義之故予買

田之日卽屬族賢者而已無涉與己之子孫更無涉用以竟先宮允毅軒公志也崇禎三年二月以宣詔歸計通籍八載叨列日講荷沾賜錙兼積俸銀計六百餘兩契買附郭田三頃公舉憲獎善人禮部儒生叔允昌董其出入設極貧次貧二則覈實均贍更設向善力學守節三規歲舉優給另置買義莊一所重葺成齋公都憲牌坊嗣後日久遞傳本族賢能堪任者遵依定例世爲公產尋上諸各憲蒙撫院曹公過獎檄下郡邑給帖優免捐贖銀十金爲葺坊助題忠直貽謀以贈一時若臺使者王公兵憲錢公郡侯史公咸義其事獎勉踰涯而司李王公尤加勗焉石圭計者當以公心善推置產之意世守勿失可也至哉言乎惟公可久名之日義斯稱實耳計規則十七條願世世子孫無負邦君大夫獎勉之意云

三講官祠在虎邱二山門外祀明大學士文文肅公震孟少詹

事姚文毅公希孟祭酒陳文莊公仁錫

顧孝介祠在天賜庄祀明御史宗孟

丁參議祠在貞三菑丁香巷祀明溫處道布政使司參議元復

本朝乾隆十年建

鄧孝子祠在婁門內張香橋祀明孝子汝甫

許中書祠在角直祀明中書舍人自昌

忠孝祠在平江路中營基巷祀明霍山教諭龔元祥及其子炳

衡崇禎中巡撫都御史張國維奏建賜額

張公祠在虎邱山塘祀明巡撫都御史國維崇禎十三年建

本朝乾隆十年署知府趙錫禮重修

有記

忠烈王公祠在大儒坊巷祀明遵義知縣佐聖崇禎十六年建

蔡忠襄公祠在虎邱養鶴澗旁祀明山西巡撫都御史懋德

本朝康熙二十五年建乾隆九年給帑修

宋御史祠舊在虎邱祀明巡按山東御史贈大理寺卿學朱今
圮

萊陽二姜先生祠在虎邱養鶴澗旁祀明禮科給事中採行人

司行人塚

本朝潘耒二姜先生祠軾轍齊名世早知百年忠義繫人思忠傳折檻排奸日義想銜刀伏闕時兩地青燐埋宿草一山紅樹妥新祠吳門野老多相識雪涕爭看幼婦碑

蔣參議祠在虎邱祀明天津兵備道布政使參議燦孫封中書

舍人之達耐

本朝康熙五十五年建

吳氏二給諫祠在仁三菑祀明刑科給事中贈太僕寺少卿之

佳及其孫兵科給事中迺

本朝乾隆六年建惠士奇記

金文通公祠在虎邱山祀

本朝太子太傅之俊

方公祠在虎邱金粟房祀

本朝分守蘇松常道國棟

吳郡守祠在虎邱祀

本朝知府吳道煌

宋文恪公祠在虎邱二山門祀

本朝大學士德宜

湯文正公祠在虎邱祀

本朝巡撫都御史斌乾隆九年知府覺羅雅爾哈善請於巡撫

侍郎陳大受即廢祠改建一見府學

陳大受新建湯文正公祠碑自古有功德於民

則祀之非獨崇報之理固然抑其人之精神志氣愾乎天地之間動於人心之不言而同然者也三吳連城數十人物殷

阜財賦充仞為天下劇

國家命重臣巡撫蒞茲土者欲自暇逸不可得每矻矻焉以自勤於其職間亦多以勲勞政績著者而惟睢州湯公之賢為稱首余生也晚後公幾六十年而來官於此蓋嘗反覆公之遺事讀其奏疏告諭諸篇以追想公之誠通於上下者而後知非天下之真儒不足以語致君澤民之大道也學術有為己為人之辨志乎為人則雖黜歛爛然外焉而已志乎為己則澤被蒼生而皆在於所性所學之內公少遭閔凶以難難困阨淬厲其身心已而與北方之學者講習討論灼然見天命人心之大原以續承聖學為己任本洛閩之精微而會通之以救功利詞章末俗深痼之弊其學最為醇正而其治吳也承習俗靡敝財用匱竭獨日擊而心憂之民間疾苦輒痛切上陳化俗以敦崇節儉興行禮讓為先務居官二載嘉謨善政不可殫述而一稟於至誠使聞之者油然而生其向慕遷

改之心行畧載公秉燭治事夜分始假寐口中始食或勸進藥餌以輔衰暮公慨然曰君命即天命也而安所疑慮乎其秉心塞淵如此然則在官言官在學言學公之所以自盡者未始有二不可見於是哉初吳人欲生祠公公拒甚力既而建祠於府學年久就頽乾隆九年余始因虎邱舊祠改建以祀公僕吳民追思慨慕者得以隨時而致其誠敬焉夫公之靈爽不專在是然此邦公之甘棠也公往矣而所以愛吳民者未嘗與之俱往斯祠也公之神其亦有所樂於此者與

顧孝靖先生祠在虎邱山塘祀

本朝旌表孝子天朗孝靖天朗子宗人府府丞汧康熙四十二

年扈

駕南巡

聖祖仁皇帝御書追賜天朗者也

韓宗伯祠在婁門內祀

本朝禮部尚書蔡

張孝廉祠在縣學東祀

本朝履素先生慶孫

已上祀典

顧元公廟在黃天蕩東祀晉驃騎將軍榮以其墓在此故其地

稱為顧墓

詳見墓

元知縣周舜臣重建

元周伯琦顧元公祠碑吳城之東六里有邱焉

曰晉散騎常侍顧元公之墓至是千有五十四年矣吳人謂之顧榮墓又以地形如鳳名鳳凰嶺墓前故有祠歷歲滋多蚩氓褻祀他鬼褻而弗虔過者病之毘陵謝應芳氏避地其側睹茲污黷惕焉不寧請於長洲令真定周君舜臣修祀而釐正之復徵工改創祠宇新像設具器用秩然完飭祠前故有二墩植以梧桐名雙梧墩以張華嘗稱公為鳳鳴朝陽也他日應芳介江東薛毅夫熊進德謁余文於麗牲之碑史稱公機鑿絕人器識超朗有文武長材始與陸機兄弟入洛號

三俊方歷朝署自效值宗室相殘宮輿播遷乃沈酣晦跡崎嶇而南屬陳敏阻兵竊據溧陽姻族盤固雖俯首受署佯順風旨而潛誘同心昭諭大義卒延司馬氏不絕之緒其功不可少也王導表為江南之望有以哉或謂公與賀循齊名陳敏之亂循以老疾不起疑與公異轍嗚呼守道者以全身為潔狗義者以致身為忠未可重輕之也永嘉之際運祚屯厄其奸詭險鷲擅權流毒者後世唾斥不啻鬼蜮若公之忠義而功在天下世所追慕睠睠不已豈可以人力致哉記曰以勞定國則祀之顧公是已作迎送神詩俾吳民歌以享焉其辭曰羣岳之望兮岱宗南土之望兮顧公岱之雲雨兮歲以豐公之忠義兮功無窮邑有賢宰兮新其宮率吳民兮潔齋以恭千載一日兮人心同樵蘇遠路兮馬鬣為封公不死兮精誠上通永望於吳兮配彼穹窿鳳凰翾翾兮棲彼梧桐吳人追慕兮嘉慶是蒙教我以忠兮繫疇之功至正二十五年仲冬朔日明高啟顧侍中廟軍司吳國秀機神夙超朗弱冠游洛師已蒙南金賞崎嶇諸王幕沈湎務遵養中罹廣陵艱計服匪誠枉風雲一揮扇義旅臻同響事成恥言勳飄然理歸鞅晉社始東遷羣賢悉收獎道謁真感會矯翼丹霄上德聞一代稱迹泯千齡往時屯之良佐英謨益堪想墳祠託荒郊蕭條並榛莽童侵雨隧淫巫闖塵幌大夫過停轅式瞻

為含愴衣冠復故貌几筵陳新
享寡劣忝鄉人因歌表遐仰

東山廟在虎邱山門內東祀晉司徒王珣珣與弟司空珉捨別

業為寺故寺中立祠祀之又立西山廟於西以祀珉珣廟又

稱短簿祠今居民皆祀為土神

羊太守廟在烏鵲橋南劉宋時羊元保守吳廉素寡欲去後民

思之故為立祠

五賢祠在虎邱山祀唐蘇州刺史韋應物白居易劉禹錫宋長

洲令王禹偁暨蘇文忠公軾明萬歷二十六年長洲知縣江

盈科即平遠堂建

江盈科五賢祠記虎邱北隅有堂曰平遠其前為虞山橫伏拱揖諸流南瀉如白練其前為虞山橫伏拱揖諸流南瀉如白練

平田遠野蒼翠交映堂所由名以此堂故圯萬歷戊戌僧微

密募金一新其制子登眺徘徊欣然會心因憶唐韋左司白

少傅劉賓客宋王之蘇子瞻此五君子皆絕代偉人韋白

劉俱刺郡王宰長洲蘇晚年寓吳其於茲山登覽遊樂不啻

數數名篇麗咏載在傳記然而千餘年來未聞有俎豆五君

子於山之側司土者其謂缺典何夫三尺童子晝而嬉游夜

輒入夢神所洽也矧五君子稟象緯之精岳瀆之秀生為名

世沒為明神英爽靈異御虛乘風無不之也無不在也茲山

尤其平日賞寄之地則夫晴塢煙嵐花朝月夜野芳發而如

繡山泉響而若琴猿嘯鶴吟風呼谷應安知五君子不翩翩

焉驂鸞馭蚪相與遊戲其間嗟人民之已非慨城郭之如故
邪雖以科之不敏想像五君子履綦真有恍焉見貌慨焉聞
其太息之聲者然則俎豆之舉其安可已乎爰用具文請諸
督學陳公岳伯曹公郡侯朱公即平遠堂妥五君子之靈血
食焉僉報曰可予復捐金創設木主以八月望日具牲載醴
肅拜祇祀自今以往令茲土者春秋享祀罔有佚缺蓋予於
此堂始而有會卒復有感夫吳王闔閭據有吳會睥睨中原
不稱霸業之雄乎死而埋骨此山金錮其內虎守其外曾不
數世斬焉邱墟而五君子儼然儒流位不稱德千世而下豔
美其姱志亮節文采風流靡不欣慕願為執鞭即今煥然俎
豆在此不在彼然則士之不朽豈必千乘之富君王之貴哉
予以告夫世之為士者努力於其所為不朽而母但富貴之

為沾沾也斯子請
祠五君子之意也

魏諫議祠祀宋諫議大夫知州事庠至道中建

翰林王公祠祀宋翰林學士禹偁在虎邱及長洲縣舊治今廢

姑蘇志公嘗為長洲宰天禧四年子嘉言復宰長洲作堂祀
之後又建真堂於虎邱藏小畜集其中知州康孝基撰碑景
祐開范仲淹守郡嘗為之贊後其子純禮易之而去淳熙九
年知縣曾栗復繪公像而祀之黃由題記仍刻歐蘇黃三公
詩贊於石慶元開令黃宜又作堂於縣治東偏名企賢堂由
復記之互見公署黃由記孟子之言大丈夫曰富貴不能淫
貧賤不能移威武不能屈蓋古之所謂大丈夫者必有高天
下之識容天下之量蓋天下之氣不得志則獨善其身得志
則未嘗不欲行其道乘田委吏不敢辭卑而盡吾職之當然
及乎立人之本朝則謀王斷國以身殉義死生禍福不足以
動其心豈尋常瑣瑣者所能為也後世徒見古人功名鼎盛
以為是出於偶然不知胷中涵養早正素定非一朝夕而紀
旂常汗簡青特其粗也內翰王公元之自為布衣已慨然有
經綸天下之志洎遭明時事聖君正色立朝凜凜乎不可犯

文忠蘇公至追配以漢唐六君子平生大節載在信史夫人
能言之若夫服勤小官孜孜民事言誼卓然有大過人者國
史逸其傳或不得而紀也公以雍熙改元宰吳之長洲首論
權酒之弊懼遺斯民之害以至激風俗而厚教化抑兼并而
哀流亡形諸壁記而垂詔後來者大率皆有深旨非涵養之
厚不以職守大小貳其心者能若是乎公沒二百年邦人雖
知公之有德於民莫有發其微者今總卿顧川曾侯棗德寬
來宰是邑始求公像繪之而并鑱歐陽蘇黃詩贊於石嘗屬
余敘其大槩矣蓋曾侯之去十有七年天台黃君宜實來拜
公遺像而且歎祠事之禮猶闕乃闕縣治東偏建堂而奠焉
而求文以為記竊謂公之雄文直道暴白天下豈待余之文
而後信况獲附名於三公詩贊之尾尚復何言昔王文公介
甫宰鄆有聲利興害除民甚便之其後坐廟堂臨大政乃用
其所以治鄆者而治天下惜其學術喜同惡異故為相聲名
減於邑公則不然自令滿名試再陟諫坡三登掖垣而晚入
翰苑危言讜論裁抑冗費禁戢游惰緩刑薄賦修德厚本終
始為上言之而愛民之意出於一轍咸平以來宰為各臣然
則由百里之政充而至於致君澤民果有異乎哉長洲為今
壯縣令宰各德前後相望其間因是有聞而登宰輔者豈公
風流在人於今未泯邪黃君舊同學校知其人不苟為政三

年去之日如始至燕居之所未嘗葺而獨於此焉惓惓可謂知所本矣

孫學士祠在萬壽寺宋天聖中直史館臨江孫冕守郡有善政

吏民敬畏立祠祀之今廢

三賢祠在虎邱西嶺祀宋范文正公仲淹胡安定先生瑗尹和

靖先生焯明嘉靖開郡人吏部尚書吳一鵬建湛若水記

知州事少師陳省華大卿葉參秘閣姚憲三祠並在虎邱雲巖

寺乾道五年郡人立陳伯震記今廢

康都官祠在虎邱山祀宋都官員外郎知州事孝基

蔣學士祠祀宋樞密直學士知州事堂

許文正公祠在甫里祀元魯齋先生衡明初建嘉靖開燬

本朝康熙八年重建

顧原魯先生祠在報恩寺東祀元隱士愚舊在陽山大石塢明

嘉靖中督學御史鍾繼英建達善書院即其中祀之後移建

今地裔孫啓明存仁耐周忱記

明歸有光顧原魯先生祠記前元之季崑山有隱君子曰

顧原魯先生居於海濱讀書學道不求聞於時端居一室憑

几而坐所當兩臂處遺跡宛然手自批注經史後其家懼禍

悉燬不傳然而海濱之父老至今能言之四傳而至其孫啟

明今為太倉人稍徙至郡城有子存仁舉進士為禮科給事

中得推封其父尋以言事忤旨被謫居庸關之外久之得還

吳給事既被廢家居尤喜考論先世故事而郡太守歷下金

侯城頗采父老之言又以封君之敦尚誠朴足以風厲末俗

東帛貴于邱園世始得以稱述其名若夫許由卞隨務光之徒以與人主以天下相揖讓此宜其彰彰較著矣而谷口鄭子真蜀嚴君平皆脩身自保揚雄少從君平遊已而仕京師顯名數為朝廷在位者稱此二人故能聃於巖石之下而名震於京師由此而言非此數者雖沒世無稱也而又有不然者古之君子脩身學道寧憔悴於江海之上而不顧彼非有求於世者然約而愈顯晦而益章逃名而名隨之傳記之所載不可勝數無求於世而世亦不容不知之此奚必有所待耶若原魯先生沒於海上至於今二百年而其幽始發則士之修德勵行者何憂後世之不聞耶郡太守表章之意微矣祠凡為堂寢廡門若干楹始作嘉靖三十年十月某日某日落成於嘉靖三十二年十有一月某日

盛御史祠在虎邱山浜祀明御史景舊在婁門歲久圯

本朝乾隆十二年撤廢祠改建今所

孔侍郎祠在東華橋巷祀明兵部侍郎鏞

沈中丞祠在葑門外官浦祀明都察院右副都御史林

陳御史祠在虎邱寺內東偏御史名瑞福建人嘉靖四十二年來按吳有惠政民多思之為立生祠

葉公祠在帶城橋西祠明長洲知縣成章

本朝康熙十一年增祀

本朝長洲知縣沈恩舉

韓公祠在虎邱山塘祀

本朝巡撫都御史世琦

顧公祠在虎邱二山門祀

本朝吏部考功司員外郎子咸

二蔣祠在甫里祀

蘇州府志 卷二十一
本朝進士德竣及其兄歲貢生維城康熙初歲饑維城兄弟出粟以賑多所全活里人感之德竣沒卽陸魯望先生祠置主奠焉後更建於陸祠之東並設維城木主

堯峯先生祠在虎邱二山門祀

本朝編修汪琬

七姬廟在賽金巷祀元左丞潘元紹妾程氏瞿氏徐氏羅氏卞氏彭氏段氏明太祖兵破蘇州七人同日自經張羽志詳見墓

三節婦祠在葑門外祀明旌表節婦蔡氏姜氏董氏萬歷二十六年建

赤闌相王廟在府治東南赤門內相傳王爲吳闔閭築城死而

爲神洞庭西山亦有祠

神姓桑名湛璧蓋不可考或謂赤闌以廟近赤門故名又吳地記云南面

討擊將軍黑莫郝墓在蛇門裏周敬王六年築城而死今呼赤闌將軍或云赤闌卽赤門相王卽伍相云

韓將軍廟在城中官瀆橋南按漢書橫海將軍韓說與朱買臣同受詔在吳中治樓船破東越有功卽其人也

已上舊祠及土俗所祀

韓洪軍亂奔越中官寶壽南對英善蘇武洪軍韓鎰與米買豆

我今平未開洪軍起云赤闌唱赤門滕王吟曰滕云
持舉洪軍黑莫滅墓在赤門裏風姓王六羊築越而

蘇州府志卷第二十三 壇廟三

表園林王廟在赤闌東南赤門內滕王為吳闔閭築越而

蘇州府志卷第二十三

壇廟三

崑山縣社稷壇在縣治西南三里麗澤門外地隸新陽舊在縣學前

宋淳祐間知縣項公澤改建元至正十七年知州費復初重

建今所

本朝雍正十年

敕修宋項公澤崑山縣社稷壇記邑有社稷春祈秋報重農事

大成殿之戟門豈惟祀非其所神弗克歆抑且背先聖先師

焉前政常有意修復惑於陰陽拘忌之說而未果予竊謂為

宰者膺人民社稷之寄平土播穀神實司之民寔賴之詎容
不知報本之為急務乎乃即舊址而經營之砌築四壝創造
齋室周以垣墉植以松柏幣有瘞所門有扁鐫其神位列於
齋室其祭器寄於邑庠至期取用焉典祀於是乎嚴矣惟茲

涇邑營繕孔艱屢政無暇今幸肇成繼自今其以時整葺毋或因循與宗祏相為無疆故書以示來者淳祐壬子中和節風雲雷雨境內山川城隍神壇在朝陽門外地隸新陽縣明洪

武三年知縣呼文瞻建

本朝雍正十年

敕修

先農壇在朝陽門外

本朝雍正六年

敕建

厲壇在新陽縣北門外舊在縣治北三里馬鞍山之陰明洪武

三年知縣呼文瞻建正統間知縣羅永年移今所舊有鄉厲壇在縣境

共二百七十所今久廢

已上新陽縣合祭

城隍廟在馬鞍山南即慧聚寺址舊在平橋北明洪武三年知

縣呼文瞻移今所宣德九年重建景泰三年建兩廡

本朝順治十四年燬康熙元年重建

關帝廟在曇花亭下

本朝雍正間修

火神廟在馬鞍山西北

本朝雍正十一年

敕建新陽縣合祭

劉猛將廟在馬鞍山頂文昌殿左

本朝雍正十二年重修新陽縣合祭

節婦祠在儒學西

本朝雍正元年

詔建

惠應廟在縣西北馬鞍山之陽祀崑山神唐中和二年建宋崇

寧間敕賜惠應廟額封靜濟侯紹興間加永應淳熙間加昭

德慶元間加顯貺開禧間改封昭惠公嘉定間加靈濟寶慶

間加福應紹定間加康祐淳祐間封顯祐王明洪武中改封

崑山之神永樂三年廟燬宣德五年重建

本朝雍正八年燬乾隆六年重建

盧志有朱將軍廟在縣治西

嘉定五年敕封靈祐將軍寶祐四年改封武信將軍景定元

年進封武信侯明洪武初革宋黃昂惠應廟記蓋聞三代迭

號仁義攸歸七國僭稱簡牘是謂或封建子弟或追贈公侯

居於域中莫斯為大然有功於國有惠及民後世尊其道者

亦受命無愧矣大聖山王者馬鞍山之神也按圖經梁沙門

慧嚮謂茲山諸勝可與佛寺雖用志彌篤而力莫能逮一日

冥寢山神前現曰願助千工以副斯意是夕雲驅電掣風撓

雷動駢闐之跡遍於林莽鞭扑之聲震於巖谷恍惚中夜驚

悸數里詰旦陰翳潛廓靈基倏成雖疊石之相差若築出之

夷廣橫袤十七丈高聳二丈小大規矩混然削成其直如繩

贊其能賤疏一發如石投水施利四來如川赴海凡所得者
 僅踰千緡於是鳩工市材揆日載事歲時未易斤斧告停危
 簷翬飛叠瓦鴛鴦窻牖明邃欒赫奕殿堂廣其舊制廊廡
 闕乎新規門闌有闕左右有序中塑神像森衛靈官威儀聿
 陳藻繪斯煥蓋所以荅神休而肅祀事也噫古之卿士有益
 於人者典禮尊其祀焉矧茲山王垂數百載而英烈不昧始
 施功而成善事終佑民而享明德建祠追號亦其宜矣前所
 謂有功於國有惠及民後世尊其道者受命無愧其斯之謂
 歟昔因訪舊胥臺薄游是邑聞其異蹟關於記事既蒙確
 請不獲牢讓辭旨淺近斯為愧焉明道二年二月十五日

衛文節公祠在景德寺西即報國寺大殿址也祀宋太師秦國

公涇舊在馬鞍山華嚴寺左明景泰二年知縣吳昭建後徙

縣學東偏成化六年教諭劉衡訓導章經奏祀嘉靖十五年

知縣楊逢春改建今所明沈魯衛文節公祠碑朝廷崇禮先

除墓道使人守護如法崑山縣儒學教諭臣劉衡訓導臣章
 經奏故宋太師秦國文節公衛涇生於是縣之石浦早負經

世之學魁多士於淳熙甲辰登要樞參大政中外歷任四十
 年所言皆經國遠謀關係世教為甚重自文正范公後繼先
 憂後樂之志者此其人也方韓平原之熱燄熏灼毀譽舛忤
 今年朱元晦斥明年趙汝愚薨而偽學之禁日迫正士接跡
 遠引猶排擊無所容其身而惟重利祿輕行檢者附麗以成
 其私攘臂僥運於一時而無以為善後之計公以理亂安危
 之機閒不容髮直疏利害請除之而佞胥師且為世大戮矣
 尤務搜賢才以立國長養振作以固不拔之基講求大計規
 恢遠圖而復見扼於彌遠之擅國卒無以售其所言夙與元
 晦有契分至是乞召還而元晦已卒復移文新安梓行所注
 書又請為石文殿修撰張栻賜諡於今三百年為士者皆能
 言之而舊祠在馬鞍山荒涼搖落神弗寧爰民有以義起者
 為徙置學宮之旁俾七世孫烺居守其墓在湖州者亦已蕪
 沒不治臣衡等稽諸禮典法施於民則祀之夫立朝正色不
 忘規諫名誼所在急於饑溺故能克殄凶慙成謀而不居其
 功志雪讐恥自奮以厲不挫之氣其於君臣父子夫婦之大
 倫至言懇切惻怛忠厚而體國之誠根於天性鄉之先達為
 法後進如此而歲事不修祀典有缺使士大夫何以為風厲
 而世道無所取衷焉乞量為定立時祭則象方來庶不負明
 詔崇禮之盛意上可其奏命禮部參酌儀注歲時祀以特牲

奠帛為三獻禮而祠墓彼此咸為嚴禁約毋有所毀本部右
侍郎葉盛與公同里常集公遺事得其出處大節而世遠湮
沒者不能具載知縣唐素主簿吳欽為勸說協規之士買田
數十畝以助修葺費而始得永為世業俾曾撰詞刻石以示
遠於乎天之生才必資於世用用或違其才則無以自見於
世而論者謂南士儒緩不及北之剛毅慷慨多大略是以吳
楚之國常不競於中原此非定論也金源氏之方興以回山
倒海之力見屈於宗忠簡公之孤軍無援而斂戢不敢南下
者累年李忠定公區處天下事規模措置再餘月而畢舉勃
敵為之震懼使二公終用而得盡其才將海內豪傑惕息聽
命之不暇女功之成夫誰能居其右者而謂閩越南產迂儒
僻士果無能為邪金源既衰北鄙多故宋雖偏安而才武雄
略之士可扞牧圉者甚眾使公柄用而得與戮力必能集眾
謀申警備厲銳養威以作南士之氣使無忘北鄉觀形勢而
決事機進可以得志退不失乎自強假以歲月則大讐可復
而宋室可興矣夫何高才見疎寡謀自用而動不相時舉天
下於一擲卒之敗衄之餘沒世不振雖公之明見不爽悉如
平時所料而才不盡用所可見者如此而已於乎天乎是曷
故哉於其祀作歌以侑神歌曰山蒼蒼兮海茫茫懷故都兮
天一方中原在遠兮不可望事往人異兮而我心徬徨嗟直

行以自遂兮恥狗時而為否臧苟校功資之得喪兮夫孰畏
乎名德之弗昌元雲兮翔翔靈風肅兮來景光廩有食兮食
有堂修我歲事兮靈其來享時驟集
而不可久兮吾將返颺輪於帝鄉

安節先生祠在縣學西祀明處士龔詡萬歷二年建

本朝乾隆二年給帑修明顧潛詩少從戎伍老農邨辛苦生平
道義存社甫憂時詩卽史伏生傳業女

仍孫鄉從祀典應千載祠儒官僅一
垣政治漸淪懷野古短碑會為洗苔痕

葉文莊公祠在縣學後祀明吏部侍郎盛弘治二年知縣楊子

器建明吳寬記故吏部左侍郎諡文莊葉公事英廟為兵科
給事中當己巳之變京師戒嚴公忠憤激發數月奏疏

七八上區處兵事悉中機宜自是有名于時後參政山西遂
擢都御史南北巡撫制禦蠻夷功績益著憲宗之世乃召為
禮部侍郎及改吏部而終公蘇之崑山人也既沒幾二十年
慈溪楊君名父由進士來知縣事廉慎有威而倦倦焉尤以
崇正黜邪為念自以少知公名今獲令茲土無以致仰慕之
意適今天子初卽位用臣下言撤天下佛廬之私建者君承

蘇州府志 卷二十三 壇廟三 五
詔而喜曰吾志可成矣蓋謂公之為人天下皆知其賢況鄉人哉沒而祀於其鄉此禮也顧學官後有當撤者乃特毀棄其像以改公祠設位於中歲時率僚屬師生拜而祀之他日託公之子壻兵部郎中虞君元凱來道其事而以記請夫世之仕者孰不急於政事有政事矣然無文學以資其識則所行者不免為俗吏之事又孰不重乎文學有文學矣然無氣節以立其德則所能者不免有文人之譏故三者每患人不能兼而有之公之政事載於國史者甚備已不必論其書冊滿家為學者考古至忘寢食所著述專以歐陽子為法純雅明白其詞藹然平生尤慕鄉先哲范文正公身雖已貴蕭然猶寒士也諂佞之徒有所倚而起者惡之不忍與接其所自處可謂重矣是以其名起於當時傳於天下而士大夫置公於國朝名臣之列此豈無自而得者特公以中歲而歿使天假之以年其見於世者當又不止於此於戲惜哉寬初入翰林雖及接公而受其誨言然不久公已去世竊以為恨而名父嘗有斯文之契者況其為此又當乎人心故雖無文猶強書而復之祠成於弘治三年三月戊戌之吉

柳塘祠在馬鞍山前祀明知縣楊子器初子器建野鶴軒於山

神廟左嘉靖間巡撫都御史陳鳳梧卽其地為祠縣丞石冑

構李三省祔

魏恭簡公祠在縣學東祀明太常卿校嘉靖二十六年知縣朱

伯辰建

朱恭靖公祠在馬鞍山之陽祀明南京吏部尚書希周嘉靖間

巡按御史周某奏建後圯崇禎十年提學御史开瑋具疏重

建

本朝乾隆二年給帑修

崇功祠在馬鞍山之陽卽慧聚寺法華堂址祀明太保顧文康

公鼎臣嘉靖三十八年建巡撫都御史張景賢疏請賜額

趙明

貞吉崇功祠碑顧文康公初在相位以東南為財賦疆歲輸亡慮數百餘萬壯縣若崑山常熟嘉定皆瀕海無城郭自固誠為危道與撫按憲臣定議具奏凡並海諸邑無城者悉就營築以遏寇虐僉以公不切時要惟崑山為公鄉邑乃首城之亡何公薨他邑輒竟停寢后數年倭大入寇縱掠吳越之間屠潰相望崑山時復被圍登陴拒守六十餘日發梁縱壘斃其賊帥遂不敢逼城卒以無恐公祀畧遠慮於斯為著耄艾謹呼謂公真有禦災捍患之功且燭於未萌禮宜祠報於是巡撫張景賢特為題請詔可其奏公之孫謙亨上言士民欲建立先臣祠實以築城微功但寇亂新戢勢難損財動眾臣有空地一區合自營建不敢冒用公役貽累桑梓而祠額論祭乞如楊士奇故事以稱朝廷慰荅民心之義上以公台輔舊臣事出公舉即下有司建祠於馬鞍山慧聚寺之舊址


忠孝先生祠在山塘涇祀明兵科都給事中張棟

聶公祠在火神廟側祀明知縣雲翰舊在薦嚴寺左後規入院移今所

孝介祠在馬鞍山上祀明知縣樊玉衝萬歷閒建明歸子慕樊公祠記馬鞍

山之顛負古剎東向翼於南出萬松之上嶄然而立者故令樊公祠也公之前歷十三令為祝公嘉靖中倭入寇崑山幾陷祝公守禦甚力城賴以全又五十餘年當公治崑縣民汪惠者募金祠祝公而公為之記名其祠為勝生蓋以令之生祠徧天下矣死而祠者百無一焉故以祝公之祠為勝生也及公沒而民競為公祠如公所稱勝生者公為令精勤無留事然不為苛細禁制豪右不解縱然不為文深一意邪翼小民如或傷之勸令息訟不喜為一切更張小民得業熙然樂土其政要歸於節愛縣中清靜好善樂士至其刻廉則自洪武以迄於今不乏廉令未有如公者也公生時恒茹素閒進二卯故民之祀公也薦蔬侑二卯焉災害疾病者祈公咸平以故民走公祠無虛日嗟乎公既歿矣猶拊民疾苦若是嗣公守茲土者聞公之風其有不惻焉而感淳然而興起乎則其拊民疾苦獨後公乎則公之澤遠矣

張烈愍公祠在麗澤門外祀明興文知縣贈光祿寺卿振德並其配孺人錢氏二女淑昭淑慶崇禎五年敕建

雙忠祠在  祀明山西巡撫都御史蔡懋德隨州知州

王燾

五貞祠在馬鞍山前祀明節婦李氏烈婦薛氏孝婦黃氏嘉靖

三年建知府胡纘宗額曰三貞十四年又以烈婦鄭氏節婦

朱氏耐改為五

貞節祠在縣治東北祀明王時雨妻節婦項氏嘉靖間建王世

貞記

趙烈婦祠在縣學後祀明趙一鳳妻尤氏

葛節婦祠在馬鞍山西麓祀葛緯妻周氏萬歷間建

已上祀典

王司徒祠在景德寺內祀晉王珉 姑蘇志珉捨宅為寺故僧祀之

孟尚書祠在縣治內寅賓館詳見公署

劉龍洲祠在馬鞍山東祀宋詩人劉過過廬陵人開禧間客死

崑山其後主簿趙希懋葬之馬 鞍山東齋之西岡 詳見墓 復即

東齋為祠 廬志嘉定五年建 後燬於兵元季知州僕侯斯修復明正

德中知縣方豪重建今廢

三賢祠在馬鞍山之陽祀明末貢生朱集璜諸生陶琰及集璜

子用純

本朝康熙間邑人編修王喆生建

郭公祠在馬鞍山西麓祀

本朝知縣文雄

吳王廟在泖川鄉度城邨一在永安鄉

元壇廟在縣治南明嘉靖中重建

滬瀆龍王廟在夏家浦祀吳淞江之神元大德間建

總管廟在景德寺東詳見吳縣

太保廟在半山橋北

縣志或云卽宋文毅公王葆也沒而爲神屢著靈異

已上舊祠及土俗所祀

新陽縣城隍廟在崑山縣馬鞍山前舊城隍廟左

本朝雍正四年建

關帝廟在卜山前

本朝雍正間重修一在瀾漕一在真義

節婦祠在崑山縣朝陽門天區三畝

本朝雍正元年

詔建

卜將軍廟在卜山上明萬歷間重建

盧志廟在崑山縣西南土山下嘗得其斷碑題曰唐

卜府君墓名珍字文超碑字雖漫漶多缺文尙可辨焉然無將軍之號亦莫詳廟食之始今廟中石記

不足取信姑蘇志斷碑畧云府君姓卜名

唐寶歷元年終葬於崑山西鹿城鄉卜山

相宛轉龍岡孤雲乘蓋日月縣光千秋萬古

將軍於唐末鎮鹿城有功子伯庸伯聊並著忠節沒而民思

之請於朝祀焉水旱厲疫禱輒應舊有碑歷世久遠不可辨

宋紹定改元之歲邑人陸顯重勒諸石明正德中疫疹浸淫

神屢彰靈異嘉靖甲寅倭寇薄城下匝月方昇板自蔽穿城

人遂遁去武士亦不見時知縣祝乾壽謁祠見神像始悟曩之助師者即將軍因奏春秋致祭然廟久日圯萬歷中有義民汪惠者傾家貲營購并建祝公祠於堂之西北隅題曰勝生祠知縣樊玉衝為記

忠烈祠在春和坊東祀明諸生陳淮萬歷三十二年敕建

知縣王時

熙記畧明興二百三十餘年諸生死節者自孫國伍性原六君子外蓋不多觀世屆甲寅倭環崑而壘勢在必克祝公乾壽倥偬其中先生躬冒矢石為士卒先手殲六雄鼓聲震賊鳥散明年乙卯秋賊復聚吳縣先生裹甲謁軍門請為掃淨之役大中丞曹公邗輔奇而許之乃假節先生為前茅孤軍獨陷後隊不援力戰而沒余得臺使為先生奉旨建祠之檄而令子孝廉應期出手疏白其狀乃知先生死節時孝廉方襁褓迨甲午舉於鄉偕計吏赴都門以事聞十年始得祠祀之命蓋先生之忠魂浩氣已埋沒四十餘年矣亟創祠於春和坊東而孝廉更棄產以佐不逮鳩工乙巳之十月落成丙午之七月以牲醴束帛將聖明褒卹之命為志忠烈之本末先生諱淮字禹治別號小質諡忠烈時萬歷三十四年十月夏緯詩長鯨噴霧海若死腥風茫茫白日紫髯頭赤脚千百羣鳥夷嘯聚成妖氛燕尾狐鏡鐵錮怒電光雙躍飛刀舞男

為鬼兮女為俘新魂夜夜啼村鳥此日梁都司羣羊搏乳虎戰士悠悠半不歸孤城落落空樓櫓先生慷慨髮指冠誓取么麼來豐鼓登陴一發殲其豪長圍晝解誰敢驕寸鐵不須煩天子裹瘡鏖戰無晨宵狼暉揮刃盡辟易先軫歸元血仍碧三錫徒聞赤紱榮一死疇為青衿恤何人草奏上明光曩日呱呱今七尺丈夫頭顱不博名公論由來自不平高龔鬱鬱儼崇祠廟堂豈肯輕儒生當日首鼠更誰在安得至今大節標青冥

三烈祠在縣西北溢瀆里祀明烈婦薛氏鄭氏陸氏嘉靖間敕

建後附以周恒妻郁氏

已上祀典

婁侯廟在縣東北婁縣邨祀吳婁侯張昭陸遜及昭子休元至

正二十三年建後廢明嘉靖中知縣宋伊鼎重建後復廢

元奎作新婁侯廟事狀婁侯廟者祀吳將軍張文侯昭丞相陸昭侯遜及昭子揚武將軍休也按三國志漢建安二十四年

孫權以陸遜為右護軍鎮西將軍封婁侯吳黃龍元年以張昭為輔吳將軍改封婁侯嘉禾五年昭卒少子休襲爵據今崑山本古婁縣張陸三侯實國於此質諸祀典後世宜有血食之奉而廟貌缺然千有餘年莫知有舉至正十年冬十二月知州俛俛斯始覽圖志考典禮悚然歎曰忠臣烈士之祭有國之所崇奉今歲所下赦書廟宇損壞俾之修葺臣斯幸得承乏此州有如昭遜功烈光於史冊而國民世遠遂失舊君之祀甚非明詔所以獎勵忠臣之意即下令以赦書從事乃相州城東北三里婁縣故治有叢祠一區撤而新之考三侯冠服之制像設其中文侯昭侯並位南面揚武西向俯坐又合廟左佛廬四程為祠祀齋室俾里人教授其閒緣垣四周前為崇門題曰婁侯之廟閱明年十月某日侯率僚友具牲幣以落其成顧羊豕所麗石未有刻辭謂奎嘗參預茲議使狀其始末請文於作者若三侯德業之詳則有吳志本傳焉在焉

張公廟在東南門內祀宋知縣文定公方平舊在縣學後圯移

建今所

王文毅公祠在縣東南新漕里祀宋大理少卿葆乾道閒敕建

明嘉靖閒燬於倭崇禎末重建

本朝吳偉業重建王文毅公祠記公第宣和六年進士授

麗水簿紹興改元疏陳十弊兼請建儲執政偉之遷宜興令時淮浙用兵供億煩困而公策辦軍需將士稍戢後擢司封郎權國子司業俄拜監察御史兼崇政殿說書秦檜柄政日久陽欲告老公言勿論親仇舉賢自代檜默然不釋等為考功介立持正出知廣德軍移守漢州德政洽聞擢瀘南安撫使逾年召副廷尉改浙東提刑以年古稀告老溯公壯年通籍國旁午愛公者幸其身遠闕廷罔貽戚辱而公志憤偏安心懷激烈既而奸相當權朝臣側足公維亮節清風傲歷中外侃直不阿從容進退晚好經學尤邃於春秋平生獎厲後賢允稱大儒宗範歿後奉敕崇祀甚盛典也明興弘治中裔孫成憲重建碑亭迄今僅存遺址廟貌不修祀典寢缺漸忘其功德所由來矣癸未春裔孫泰際成進士暨其宗榮皆余鄉榜同年謀新祠宇鳩工肅事因請為記於乎五百餘禩流風邈矣而奕葉彌長芳徽未歇猶足銘彝鼎而被絃歌也公字彥光其先蓋三槐名胄云

勝生祠在卜山上祀明知縣祝乾壽詳見卜將軍廟

祝公祠在縣西一十八里祀明知縣耀祖縣志耀祖築石塘民德之立祠塘上至今

稱祝公塘

清遠先生祠在九保西江邨祀孝廉歸子慕卽其讀書處也

女媧氏廟在縣東惠安鄉大駟邨

景雲大王廟在縣東北蔚州邨祀唐吳國公尉遲恭姑蘇志相傳敬德生

此邨故祀之或云敬德封吳國公故廟食於此

巴王廟在縣西北三保互見墓姑蘇志舊傳農人墾土得斷碑云彭府君墓在巴王墓南由是

知廟下有墓巴王彭府君莫知其詳

黃姑廟在縣東三十六里地名黃姑范志父老相傳嘗有牽牛織女星精降焉女以金篋

劃河河水湧溢今邨西有百沸河鄉人異之爲立祠舊列牛女二像後人去牽牛獨祠織女禱祈有應歲七夕鄉人醵集廟下占事無毫釐差舊有廟記今亾之盧志黃姑塘今隸嘉定明高啓詩農祭頻來水廟扉銀河東望失星輝天孫秋夜應相憶一去人間竟不歸

已上舊祠及土俗所祀

常熟縣社稷壇在北門外舊在縣治西一里明洪武三年移置

今所

本朝雍正十年

敕修盧鎮琴川志常熟社壇在縣西一里莫考創始紹興甲戌令陶任古淳熙辛丑令陳映嘉定辛巳令葉凱皆嘗修治

然規模粗備禮制終未盡合加以地勢拘逼湫溢特甚嘉熙改元令王煥乃因故址闢而新之東西二十七丈南北十七丈按政和祀式參以朱文公問荅及武昌記所載爲五壇四壇東社西稷居前北向東風伯西雨雷師居後南向與社稷

相背中隔以墻壇皆三成前二壇址各方二丈五尺兩成三
 成各殺尺崇二尺後三壇址各方一丈六尺兩成三成各殺
 尺崇八寸壇四門社稷各壇方四丈五尺高三尺五寸墜坎
 二居壇外之西北風師為一壇方二丈八尺高二尺五寸雨
 雷師同為一壇高如風伯而方倍之南北各為齋廬三間西
 北為大門扁以社壇繚以周垣知府事王遂記龔立本志宋
 時壇在縣治西今致道觀前民居其舊址也元制亦合祀明
 洪武三年移置社稷壇於北郭門外墻圍一百五十丈有主
 石兩向宋王遂記端平更化之歲山陰王君煥來宰常熟至
 召邑之故老而問政焉曰久矣此邦之不獲乎上下也故老
 則曰前宰孫應時後皆有以自取也君愀然作色曰是吾邑
 化未始更也乃新學宮飾教令謂子游邑人也別為宇為像
 祀之收言氏諸孫於農圃而教焉招四方之士若邑之秀子
 弟而學焉士風以變民聽以聳而以為猶未也昔泰伯之有
 國於此也禮遜之俗推重天下今渡江百年授田無法制賦
 無藝民無常產則無常心宜也乃通邑而經界之以昌吾邑
 而猶以為未也有田必有役而役莫便於義合公私高下為
 之十餘年不止仁聲義氣充塞一同大綱小紀具在方冊此
 及三年教化興而賦役簡士歌於學民舞於塗今日之事有
 大於是者乎設壇以祀社稷而風雷雨附焉皆本於朱文公

鄂州社稷記倅來以圖請於郡太守曰予至之三日檢視壇
 壇之不如法者命有司修飭畢具又去淫巫之幻以惑眾者
 暮年之間人用安業歲以大熟餘非不樂此而不為也祀典
 之不恭而老佛是徇民義之不務而巫覡是虔余甚不便於
 此乃掃地而更新之以莫春庀具季夏乃畢將以八月中辛
 集吏行事俾民與觀焉子其誌之遂雖以不文為辭然心許
 之會聖上不以為不治易郡甬東還家未幾則令已被命升
 帑轄而進諸朝徵子文益力予惟文公所記一本政和祈儀
 而類禮有書始自通典終於嘉定新禮往往詳於禋獻陟降
 而畧於壇壝而嚮有所謂社東稷西風雨少却皆北嚮者有
 所謂同壇而共牲者於圖疑未合而未以證也抑聞之禮
 曰郊社所以事上帝也又曰社者所以神地之道也意者古
 先聖王郊所以祀天人也又曰社者所以祭地諸侯用之惟天
 子為能祀郊故得望祭百神若諸侯則止於社稷故勾龍棄
 以功配風雷雨師以其陰陽晦明及百物者因類而致之上
 不敢擬於太社王社之制下不與羣姓立社齒其樽罍有數
 牲帛有式至於車服之微因其尊卑大小咸有科級報本反
 始禮之至也而別嫌明微於禮之中又有禮焉誠能積精致
 感於勝蠻之閒則於神乎無諂何憂乎巫覡自是以往風俗成而氣
 禘之務則於神乎無諂何憂乎巫覡自是以往風俗成而氣

習厚有以他道惑民者鮮矣子曰明乎郊社之禮禘嘗之義治國其如示諸掌乎命之為此庶乎其善治國矣故特書之以示更化善俗之本恤民祀神之務而於祀典禮經因有考云

風雲雷雨境內山川城隍神壇在南門外舊在社稷壇內明洪武三年移置今所墮圍四百五十丈萬歷閒知縣耿橋繚以

周垣

本朝雍正十年

敕修

先農壇在南門外高坵

本朝雍正六年

敕建

厲壇在北門外社稷壇東明洪武四年立週五十七丈六尺

舊有鄉厲壇在縣境共六百十三所今久廢

已上昭文縣合祭

城隍廟在致道觀東即東靈寺基舊在縣治西十步宋嘉泰四年燬重建明洪武三年改建今所宣德初移祀於惠民藥局

尋復舊正統七年重修成化三年弘治七年復修

本朝雍正九年重修

明吳訥重修城隍廟記昔在太祖高皇帝

恭膺天命作四海神人之主爰念元季綱

淪法斃祀典瀆糅不經馴致禍災薦起民墜塗炭乃屢勤睿

思建立制度正名定分爲萬世咸憲若郡邑城隍神亦其一也初洪武元年戊申詔封天下城隍在應天府者以帝在開封臨濠太平府和滁二州者以王在凡府州縣者以公以侯以伯時常熟循元制爲州得封城隍神曰監察司民城隍靈佑侯二年己酉州改爲縣三年庚戌詔定嶽鎮海瀆俱依山

水本稱城隍神號一體改正仍頒格式蓋造廟宇屏去間襍
 及泥塑神像於是改題木主曰常熟縣城隍之神知縣田義
 以舊廟在縣西十步者基地湫隘改造於西隅衮繡坊北即
 今廟是也四年特救郡邑里社各設無祀鬼神壇以城隍神
 至祭監察官吏人民善惡以貽禍福未幾復降儀注新官赴
 任必先謁廟與神立誓期在陰陽表裏以安下民祝辭儀注
 出自宸衷聖謨洋洋發明福善禍淫之機以警飭下臣至矣
 然吾邑建廟垂七十餘載朽蠹剝落日就傾圮今知縣事郭
 南深懼無以揭虔妥靈捐俸貲以為眾倡僚屬吏民相與協
 助乃市材僦工經始於正統庚申十月落成於次年二月堂
 寢門廡宏壯軒豁視昔有加適予致仕歸老者民李渭龔龔
 時璣等相率謁文垂示永久予惟明有禮樂幽有鬼神古昔
 聖帝明王罔不以事神治民為先務城隍之祀經典弗載蓋
 後人因其保障民生以義而起者也迨宋姚鉉編唐文粹始
 載乾元中李陽冰緝雲城隍祠記然無所謂封爵配位也及
 元草廬先生吳澂記江州城隍廟後殿則曰江右列郡以漢
 穎陰侯灌嬰配食豈侯嘗定豫章諸郡而然歟自後繁藝日
 甚更始於我明歷歲云久或罔克遵吾邑得賢令屏除土偶
 鼎建祠宇將見神罔怨恫物無疵癘邑人之幸豈淺淺哉予
 耄眊筆硯久絕今茲弗拒眾請者蓋欲昭揭聖制以示後人

俾勿至於違墜也詩曰不愆不忘率由舊
 章後之作邑君子暨鄉邦友士尚鑒茲哉

關帝廟在西門內嶽廟左舊在縣北三元堂明天順間移建今
 所萬歷末增拓殿後建三義閣

本朝康熙十三年糧守道遲日震重修前建門樓置祀田十四
 畝乾隆十一年重修

火神廟在縣治西北炳靈公廟內 地隸昭文

劉猛將廟在

節婦祠在南門內

本朝雍正元年

詔建 已上廟二祠一昭文縣合祭

吳公祠在學宮左祀先賢言子又有祠在文學書院俱詳見學

校又有言子家廟在縣治東西門內亦有祠龔立本縣志按慶元志子游舊祠在縣治東北文學橋左盧熊府志亦云

在縣東北一百三十步今號東殿聖王廟無碑可考已迷其處予所見吳公祠而外別有二所一在縣治東宣德八年周

文襄公葺理為言氏家廟成化間令甘澤修弘治五年燬十年重建令楊子器給祭田三十六畝今又燬桑悅舊碑記存

馬一在文學書院即王叔果所創耿楠所遷也錢陸燦縣志

子游家廟明季火後本朝順治間知縣周敏重建又言子祠在阜成門內嶽廟東康熙二十五年奉

文毀淫祠知縣楊振藻即西莊廟改為之

煥靈廟在縣西北頂山上祀白龍之神本破山龍堂唐咸通十

三年建宋太平興國四年遷於頂山壽聖寺西偏政和二年

賜今額五年封宣澤侯遷祠於山腰龍池上紹興中加封通

濟淳熙加靈澤紹熙加通濟孚應嘉定加廣利進爵公封龍

母為靈應慈穆顯祐普應夫人明洪武四年改封頂山龍池

之神有司春秋致祭

本朝雍正初重建盧鎮琴川志世傳梁天監元年有村姥姓蔣氏居山之東因有異感孕而生白龍失所往

三日飛歸若就乳姥怖而死即所居葬之既而大雷雨豕遷於山腹歲之五月龍率來省或見形山間始至必甚風雨既

留則一境為之寒邑人於此候之唐貞觀十年龍嘗鬪黑龍於海虞山之東邑人因像事龍母子於破山寺西澗旁水旱

禱焉咸通十三年令周思輯就為廟貌以祀之皮日休記宋太平興國四年令蔣文懌復遷而歸諸頂山寺重建祠宇政

和二年賜廟號煥靈五年令朱彥求請於朝封宣惠侯遷其祠於山腰龍池之上紹興王申加封通濟辛巳逆亮犯順御

降祝文以禱時李寶奏海道之捷旣而獲禪將倪新殷簡二賊昌言於眾曰當戰之時有大龍舟旗幟皆自上植一認旗

書海虞山龔皓俄風濤大起虜舟皆不能自制遂為所勝眾因悟龔乃龍字皓者自色蓋龍助順云淳熙元年加封靈澤

紹熙甲寅歲春不雨至於夏五月殿院冷世光率縉紳禱神於慧日寺以繼邑官之後越五日而未降冷公夢白衣老人

於慧日寺以繼邑官之後越五日而未降冷公夢白衣老人

嘆曰諸公日以虔其誠我則夜以虔其身公問老人為誰荅曰我即龍也水涸甚將於何取之旁有枯澗澗底水一泓老人指曰可取矣公倏然寤因作偈曰閔雨而禱非誠莫通龍感至誠盡力其中我獨何人應之以夢願言施澤風起水湧徐覺窗紙皆鳴甘雨驟至終日不止人情釋然令葉知幾以雨暘響荅聞諸朝加封靈澤宜惠通濟孚應侯慶元初令孫應時下車未幾苦旱亦迎禱於慧日寺五月九日龍見空中當寺西尚湖之濱其上片雲正黑爪足時露而尾垂屬地可數十丈蜿蜒卷舒色如霜雪疎雨隨灑既隱復見可數食頃乃收舉邑父老以為生所未覩後二日大雨告足人謂孫令誠禱所致自是迄令終有請輒應然令嘗自詣頂山焚香默禱不用常儀嘉定十一年令趙崇意復以禱旱而應請於朝加封為靈澤宜惠通濟孚應廣利公母為靈順慈穆顯祐普應夫人且為亭軒以嚴禱賽之所自是邑人奉事加虔謹云龔立木縣志明成化丙戌知縣甘澤重建龍湫亭甲辰知縣黃慶葺治堂寢增構半山亭與龍湫亭相屹矧俊記嘉靖丙申知縣沈弘彙以故亭善崩屬耆英王澄度湫北隙地改建王同祖記萬歷三十七年知縣楊連禱晴禱雨響荅禮祀目白龍蜿蜒在上鄉人皆拭目焉爰重修祠宇錢謙益刻碑記之唐皮日休記禮山林川谷邱陵能出雲為風雨見怪物皆

曰神祀之宜矣常熟澤國也風雨怪物日作於民在有其地者苟祀之至民被其利祀之不至民受其禍汝南周君為令之初夏且旱崇其神於破山之澤上果雨以應君曰受其賜徒榮以報不可也於是命工肖其像為宮以蔭之著之於典以潔其祀於是風雨時怪物止水旱不為厲民經大荒連歲以穰其神之澤乎凡雩者春秋之道皆書之勤民之祀也日休嘉其勤民故書宋魯詹煥靈廟記政和二年漕臺以常熟白龍祠祈禱感應之實聞於朝越明年制曰可宜賜煥靈廟為額邑人以煥靈之惠著在一方而爵號未崇無以昭神貺後二年縣以狀列於府府言於部刺史遂復保奏焉制曰可封宣惠侯於是縣大夫率佐官祇奉休命宣於祠下而邑之士雲集將退咸告於丞魯詹曰侯之廟宇君與縣大夫謀之侯之封秩君與縣大夫請之今堂宇將畢而綸誥適頒邑人鼓舞胥慶盍記之以侈其事詹曰茲不敢辭惟侯之祠在破山澗上父老相傳其誕育之異肇自梁武初我宋太平興國中蔣侯文懌來宰是邑距天監凡五百年矣時積潦泛漲禱於侯得霽歲則大獲乃迎侯與聖母像歸頂山壽聖院之西偏是日白龍盤旋乎冢上彩雲焜耀乎山間迄今凡一百有四十載矣邑人乃作廟於山腰龍池上侯之壟在焉佳城峩峩方沼灑灑巖巒疊秀回抱如翼長江浩蕩沃野曼衍左則

福嶺狼崑右則虎邱崑玉遙岑寸碧列岫橫翠雲煙之祥疑
在於仙島氣象之偉寔冠於吳中觀侯之初以神力遷葬而
陰陽家咸謂勝地今新廟奕奕寔下瞰焉庸詎知其非侯之
意哉詹旣書其槩復繫之以辭遺邑人歌以祀侯辭曰白龍
之峯岩岩兮白龍之泉潺潺侯之靈煥兮祥發於茲山侯之
惠宣兮澤沛乎人寰若歲大旱兮曰雨而雨天作靈潦兮曰
賜而賜上恩之寵兮載煥乎龍章民報之篤兮締創乎斯堂
淵潛而雲飛兮克相昊天五風而十雨兮資我豐年千秋萬
歲兮擊壤千耦萬箱兮大田明周霞賓詩麟族標龍貴陰靈
識母尊雷移過嶺墓雲擁到祠門玉珮鳴初夕朱旗閃半昏
地腴美中有編氓幾萬家播種辛勞無凍餒今歲正當長養
時驕陽赫赫雨愆期高田水涸漸焦死低田可救方難支縣
官身領親民職目覩民災心慘戚急書情悃達幽明願乞神
功施雨澤太白龍神吾土生曰賜曰雨無不靈恭持片香詣
山請雲雨軋軋來虞城神龍旣憫人心切頃刻雷轟兼電掣
沛然甘雨注雲端憂愁頓使為歡悅焚香再拜獻牲膳吹笙
擊鼓送龍還浮埃不起靈車過清風輕灑龍旗翻瓊房貝戶
龍之府霓裳雲鬢龍之母我今作歌為送之神人
相依誰敢侮更願神龍永施功吾鄉歲歲歌年豐

靈惠廟在縣治東南百步俗稱周孝子廟孝子為縣人姓周名

容事母至孝歿而告母曰兒已為神當輸忠朝廷盡力鄉里

宋淳祐初邑人鄉貢進士陳權簿建祠祀之十二年進士趙

必鈿等奏神靈跡救賜廟額明洪武四年封宋周孝子之神

盧志歲以九月二十一日祀

本朝康熙九年重修龔立本縣志舊傳淮南大疫神往施紫蘇湯全活甚衆有渡江相酬者尋見廟貌始

知為神至今邑民有疾亦求廟下紫蘇湯飲之立愈

巫公祠在梁昭明太子讀書臺右祀商相巫咸及子賢舊祀言

子祠夾室明嘉靖八年巡撫都御史陳祥始建祠於致道觀

西明季練兵官占為署

本朝設分防守備遂因之以居木主遷廢順治十年改建於此
 後廢乾隆九年知府覺羅雅爾哈善重建今所明陳寰新建
 山者吾常熟鎮也其東南椒麓形勝尤倍丹崖青嶂溪河逆
 折縣城址故環之緣為西關萬井聯轅其椒有仲雍子游墓
 有老子祠麓有致道觀觀西有嶽廟有張許關劉諸忠臣祠
 當觀廟開地稍隙鄉民據之列樹鑿壙死將葬焉嘉靖戊子
 冬巡撫荷峯陳公行縣至常熟先是吳公子游以邑先賢故
 別立專祠於文廟左公既謁文廟則謁子游祠見商相
 巫公咸與其子賢亦皆鄉賢設木主廡下乃退坐明倫堂進
 一高等生俾講巫咸故實復進一高等生俾講子游既畢諭
 之曰巫與子游世次前後若此今爾縣崇奉鄉賢而乃列咸
 父子於子游兩廡於義何如瞻享既忒神必靡寧此官府責
 也然事在學校亦漫無建請何邪諸生皆稱謝因再拜言曰
 昔宋嘉定間人治地青龍岡下得古碑鏡五大字曰商相巫
 咸塚皆古人八分書縣令孫應時遂建祠宇碑記尚傳今青
 龍岡地雖莫可攷然祇在山麓無疑於是爭舉鄉民曠地僭
 踰非制請褫為祠公乃付縣令胡君君出公帑償鄉民價命
 歸曠石留其內門及堂廡橋道後建正殿以奉木主前臨

通衢作石門表曰商賢相巫公祠明年夏落成縣士夫及齊
 民日相率往拜但見崇山幽林明秀森鬱高臺飛甍與松林
 竹石相掩映莫不深洽輿情鼓舞祠下胡君以寰先嘗從史
 官後請纂言述故鐫石垂永竊惟古稱鄉先生沒可祭於社
 若公父子則豈惟鄉先生乎哉昔者周公嘗告召公曰巫咸
 又王家而朱子集楚詞注又謂公古之神巫聖賢稱論一以
 道言一以術言夫道有大小術有正邪道固可該術而術不
 外於道今如周公朱子所述則道非小道術非邪術阜夔稷
 契之所行羲和仲叔之所明萬世而下欲以輔世相君與夫
 推元運測化機者孰非巫氏家傳之學哉有功世教如此豈
 天下祠之非過況於所生之鄉而崇祀弗稱固宜當道諸君
 攷世申義而不能已也嗚呼殷商之臣自伊傅外顯名後世
 者要不多見而孔門弟子江以南無聞焉今常熟一邑而商
 周人物其盛若此豈非東南之光乎為邑後學者苟不能自
 振拔與時俗溷焉則東西南北來往具瞻身過祠下而心惟
 之能勿醜然寰敬持是說願從邑之後賢同志所戒勉者
 本朝錢謙益重建巫公祠記吾邑鄉賢祠首商相巫公咸及
 子賢按越絕書虞山巫咸所出張守節史記正義巫咸及子
 賢冢皆在蘇州常熟縣西海虞山上蓋二子本吳人也世傳
 宋嘉定間土人掘山西青龍岡得古碑八分書商相巫咸冢

五字令王煥修墓立廟孫應時為記應時以慶元二年作令
 至端平元年閏十八令始及煥記乃稱前令王公嘉定中
 地事在十三年後安得懸記其不足據如此嘉靖戊子巡撫
 陳公行縣謂巫公警宗之祀不應耐子游廡下集議立專祠
 秋報門內久之刑官踞為私署鄉人以厥祖僭配遂遷主於
 私室侮先哲黷明祀莫此為甚邑之英峻王君夢鼎邵君燈
 考邑乘企風烈喟然嘆曰嗚呼是不可以不正卜地梁昭明
 讀書臺之左建祠堂三楹春秋饗祀得如甲令從事請刻麗
 牲之碑以示永久余惟三代之君受命中興者三巫公相太
 戊廟稱中宗與復少康周宣王姬烈於國為宗功賢繼相祖
 乙保又六臣伊巫居四於家為世美書稱巫咸又王家作咸
 又作太戊文章爛然昭垂訓命後千斯年子游被其餘澤北
 學於孔氏於南方文學為大宗世祀綿邈流風茂如祠宇夷
 於鳩居木主漂為土梗表章修舉非後賢之責而誰責與世
 俗凌夷井邑遷改洞天福地斥歸池館佛宮神刹羅護家祠
 卜築則白石孽悲設版而青山雪涕二君之作斯廟也與感
 寂寞假靈盼蠻千年之香火一新百世之矚目如在其所以
 聳流俗樹風聲者用意良遠蓋不獨觀乎九京聿修厥德為
 末世之盛事也余少讀周書君奭仰止先烈輒流連不忍置
 又觀朱子楚詞注所謂古之神巫者知為上古司天屬神之

遺法今老矣舊學荒落既畧書其事復倣楚人之歌作迎享
 送神詩俾虞人歌以祀焉而并刻之其辭曰靈之生兮岳降
 神左陟右扈兮又有殷靈之逝兮登九天地絕天通兮日月
 後先神巫在天兮塵劫指掌帝筮下土兮顧眎悒悒快乾端坤
 倪兮禹跡茫茫風毛雨血兮孰辯故鄉撫彗星兮擁雲旗靈
 不來兮我心傷悲山城宮兮書臺址丹青刻桷兮映望委麗
 靈慰我兮夕降祥飈晚靄兮天門詠蕩歷商周其猶漏刻兮
 靈朝出游兮暮燕息此邦之人兮靈之曾孫吳美楚瀝兮侑
 以雞豚靈馮我兮汎瀾我我殷舜兮儼其法冠風車兮雲馬
 驅厲鬼兮朔之野懷椒糝兮旁皇要靈氛兮占吉祥靈少留
 兮安爾室商寔我人兮報事靡忒覺羅雅爾兮善重修虞山
 書院移祀商相巫公碑記虞山書院在山之麓距督糧使署
 百餘步重門東鄉內為重屋南鄉今為課士之所山長居之
 少西有堂亦南鄉堂前老桂數株藤蘿縈帶後則翠竹千竿
 緣坡而上陰森極日巖石聳峙踞石而望東西兩湖如在几
 席下余以署使篆泣虞集士校藝為徘徊久之愛其幽勝而
 惜其浸頽壞也乃偕邑令葺而完之期無廢舊觀而已重門
 之外稍北附墻破屋數椽不能蔽風雨余初意為民居未遑
 過問也客有諗余者曰公亦知此為商相巫公木主所寓乎
 余亟問故則曰巫公父子相商有功德見書君奭篇其為邑

人見梁昭明太子所撰招真治碑及史記正義今其苗裔猶
僅存舊有專祠在城西明季廢為營署木主無歸凡再遷而
後寓諸此也祀事之弗虔也後裔之式微弗克振起也支帑
於官而私諸其橐蓋公之匱祀已數十年矣余為感然歎息
或以書院行就圯修葺為難或以巫氏之後將因而侵踞弗
果行也今公既易其所難矣後來者體公德意開一再期而
修治之可以久公其從所請乎余曰善雖然講習之地不可
以輟也嗚呼之聲不可以瀆也若奉主於少西之堂修葺老
幹蔭映後先神所憑依宜無易此況書院之蹟悉仍其舊包
絡於祠堂之外雖欲侵踞無由矣爰稽諸縣牘而信贊之衆
志而協諏日成事奉二相之主以告而安焉於戲士君子立
身行道得挂名史氏記斯已難矣況其見於經為周孔所稱
道乎而自

本朝以來百年於茲又累奉

恩詔加意先賢祠墓而木主播遷享嘗幾廢誰之咎也余之始
謀完葺也慮未及此意先賢之靈爽若或啓之因緣造會適
愜於邦人士之願乎繼自今羣士肄業於斯肅容瞻拜思有
為者亦當於是相與勉焉以三不朽自勵則
斯舉也於教事不為無助余竊有厚望焉

清權祠在虞山北麓祀商虞仲明成化十七年提學御史婁謙
建弘治七年巡按御史劉廷瓚改建於乾元宮之右明季圯
本朝康熙二十五年知縣楊振藻重建尋復圯遷主於阜城門
外虞溪書院

何公祠在虞山北麓三元堂左廡祀劉宋海虞令子平舊在縣

治南衢右偏明弘治九年知縣楊子器即溫將軍廟又稱翊
聖廟元

至正三年改建後改為社學再變為醫肆嘉靖間知縣沈弘彝

勘復之嚴氏并祠為宅移祠慧日寺西又圯移祀今所

范公祠舊在縣治西南袞繡坊祀宋文正公仲淹公守郡時嘗

詣項山禱雨又濬沿江諸浦故立祠於縣明弘治間知縣楊

子器重建書院後西隅明季廢

本朝順治間改建翼京門外風紀坊之北

程公祠在慧日寺西祀明刑部員外郎式

公死土木之難

朱公祠祀明監察御史驥舊在巫公祠內今無考

崇勲祠在縣治西北文學里祀明大理寺卿章格嘉靖元年敕

建明邵寶崇勲祠記嘉靖紀年之初命下有司凡文武大臣

以孝廟名臣大理卿章公格請焉賜俞縣令王君承檄即其
縣治之西北文學里鳩工市材俾耆老鄉臣陳銓董其役隆
棟厚礎既轟且安堂室中嚴門廡森列經始於壬午冬十月
至次年秋七月訖工扁其堂曰敕建崇勲祠仲秋丁巳之日
躬率鄉之學士大夫及其子弟設位奠獻以妥厥靈乃以書
致余請記之余雅欽公碩德懋勲何能以不文辭乃言曰夫
樹軌維風崇勲表世可以久而不朽者謂其立德立功立言
以有是三者耳茲皆公所兼善具備者公為人溫厚坦易端

勁公方讞比一奉三尺本之以忠厚所隸當塗貧民三十餘

人竊官廩薪有司以盜劫論公為之平反悉從輕典清涼吳

虎哨聚為民患則寘諸重法塞河決復創戊己集場以助漕

運至今利濟故人胡某者持金密託公謝而絕之奉敕巡海

琉球國使臣六十餘人以國書賀鄰國貢物為風所漂至南

海縣境武臣欲以海寇盡戮為己功公執不可具奏請於朝

還其貲而遣之漳泉有額外之賦六萬石民不聊生公為請

蠲王文忠公特為請建耑祠歲時致祭在光祿內臣擅派物

料為按故籍除之晉廷尉多疑獄公為寃民請命者凡四十

疏得減死幾百人深仁沃膏為民怙恃且也兩正卿階一貧

徹骨郡邑饋以餘址開田公固却弗受郡侯史簡縣令楊子

器請於兩臺使者特為建仰高亭云方副臬粵東時嶺表獠

獠大舉入寇已餘二紀臬長與總兵議不合軍無紀律邊人

大恐聲播兩廣及聞公來吏士踴躍傳呼不煩一兵苗彝即

日解去自粵東移鎮滇南尋握憲章木邦孟密相仇殺詔下

邊臣議公力主緩輯卒以格遠上杭叛賊大肆標掠中外騷

動公被命至閩擒其渠魁餘黨星竄歷官南北奏疏表章記

頌碑銘序賦詩詞自予告歸杜門著述長篇短什洋洋風雅

厥德弘矣厥功懋矣厥言傳矣有一於此猶足以祀況於三

者兼有之乎吾故曰樹軌維風崇勲表世可以久而不朽者

謂有是三者耳安可以弗識也矧公車轍所至靡不尸祝何啻茲邑茲祠其主工部而兼理河道也俎豆於中河其副臬也俎豆於粵東其長憲也俎豆於滇南其為方岳也俎豆於八閩其居吾吳也闔邑黎獻陳請配享子游廟庭焉勲業炳於朝廷偉績紀於史誌聲稱著於蠻貊德望孚於閭里公之功澤所在社稷生民何啻茲邑茲祠也

楊王二公祠在文學書院祀明知縣楊子器王叔杲

唐公祠在慧日寺西祀明葉縣知縣天恩正德初流寇陷城闔

門殉節嘉靖閒巡按御史華珩題建

蔣忠烈公祠在致道觀後祀明御史欽初在書院西南隅萬歷

三十五年知縣耿橘移建今所

任公祠在致道觀西祀明贈光祿寺卿環

龔立本縣志公山西長治人倭亂時身親行陣勦寇有功既卒嘉靖乙未上採科臣徐師言贈光祿寺卿蔭一子原憲副千戶詔吳郡建祠歲祀予品別有專祠

以公有勞於邑也甲寅仲夏倭大掠三丈浦公統苗卒駐浦上將戰卜以靈棋繇曰有客王孫夜叩我門以往應之其福無倫是夕王令叩公門昧爽遂進兵斬首百五十級生縛七人溺死者不可勝數吳越勦寇功以此為最公題常熟察院壁云昔年驅馬陰山道今日提兵滄海涯三尺龍泉書萬卷丈夫何處不為家嘗聞道馳馬抵邑王令遇之落落其明日率一候吏一門卒東指行至支塘飯甚四面皆賊入敗屋中得麥粥一盂食之縷血書姓名於衣袂命候吏金葵佩印綬其卒先行葵死之公度賊少懈突圍得還太倉遣奠葵卹其家以三百金因追歎曰王常熟不知死所矣後三月王被難公寅夜至邑臨喪哀慟父老云此夕公不至舉城奔散矣公矚目如刻畫舉止修約一好女子耳至臨陣叱咤風生面作藍色嘗單騎規賊於江濱賊覺急追之前阻大溪馬臨岸躊躇公呼曰救我遂奮躍飛渡既入城命牽入院親奉食料跪進之嗚咽下拜馬亦流淚不已明歸有光詩黃梅風雨自年年今日沙頭浪拍天最是使君多大畧笑看東海欲投鞭醜猖狂捍禦勞跳梁時復似猿猱賀蘭擁眾猶堪恨李廣無軍也自逃落日孤城戰尙賒遙瞻楚幕有棲鴉將軍真冑分甘苦士卒何人甘戀家輕裝白裕日提兵萬死寧能顧一童子皆知任別駕巍然海上作金城王穉登蕭蕭遺像鎖荒

祠向憶孤身百戰時諸葛事繁那得久留侯貌弱到今疑絳帷香氣衣冠暗石棟斜陽薜荔垂曾是當時騎馬地煙中徃往見旌旗

王公褒忠祠在致道觀左祀明知縣贈太僕寺少卿鈇嘉靖三十八年巡按御史金制奏建旁建亭樹造城碑記

錢公褒忠祠祀明江西參政贈光祿寺卿泮公與王令同死事

初本合祠後改建於虞山里射圃之隅

明陳迓褒忠祠記嘉靖三十四年夏東倭

日本為寇海上深入姑蘇盡掠金帛財物載以巨艦數十連艘而進以通常熟所過焚掠慘酷死者甚眾知縣王公鈇厲氣登城身當矢石集約士大夫分門以守守制參政錢公泮守虞山門相與併力晝夜戒嚴賊至城下往來震撼不能犯遠棹舟而西王公夜就錢公謀曰島倭狂悖已甚不立殲之無以報國且彼戀貨疑行未諳水道我以輕舟火其桅而殲諸河蔑不濟矣錢公奮然報曰此排難策功之會也因相與戒行比曉率兵逐賊踴躍出城至湖則賊已得風收船入港

矣賊聞追兵且至則擁眾據險分其黨遶出官軍後二公知事已急即督兵布陣奮勇先登交戰良久為賊所乘俱死時五月二十四日也先是承平日久民不知兵一聞寇至空里奔潰賊以是愈肆猖獗至是忽見官兵追擊甚銳知吾有備又虞救兵至遂昏夜驅舟出海洋東去蓋二公雖犯難以死而其忠魂義槩猶足以懾羣凶而固百雉也於是巡撫都御史周公琬巡按御史周公如斗金公泮徐公栻先後以其事聞天子憫然為之降旨褒悼贈鈇太僕寺少卿泮光祿寺卿各賜祭一壇廕子錦衣衛世襲百戶俾有司立祠享祀額名褒忠時河中馮侯舜魚以進士調繁來知縣事乃倡義捐俸銀若干查處無礙官銀若干市材庀徒勒日舉事邑人朱寅聞之遂獻所置城西隙地助成公舉凡閱月而祠成中為堂三間左右翼以兩廡前為中門轉而東為外門庖湍既備垣茨既飭侯乃諫日治祭具率闔邑縉紳士庶奉二公神主於祠以妥以侑而祇事焉謂迨邑人知當時死節顛末以碑記為屬惟古忠臣義士圖國忘死者何限其身後榮名類皆歷時久遠論定然後得之今聖人在位眷勤忠節二公之死報封朝上恩典夕下雷厲風飛使天下莫不快心而增氣於乎豈非萬世勸忠之著鑑哉迨於是序而記之王公東陽人庚戌進士廉明果斷長於政理營建邑城不五月而集事民德

之錢公乙未進士累官江西布政司參政器度弘達所至有聲皆未易才也

二烈祠初在稅務巷即稅課局舊址祀明李祐妻烈婦盧氏及其女嘉靖開敕建後移祀於慧日寺西尋改建於乾元宮右

萬歷二年朱一鴻妻烈婦張氏附崇禎九年烈女浦位女附

歲久祠圯

本朝雍正十一年邑人吏部侍郎蔣溥重建

比於臣從一於君之義自古奸人篡竊而其故臣不幸以才

明唐順之記昔人論女子從一於夫

見籍錄於斯之時彼有棄瑕用讐之圖而我亦有伴合觀釁之便苟其黨有可攜事有可濟則逞於一擊以誅讐而復國若王司徒之於卓段司農之於泚此其勢逆而其事之難以必者也彼有棄瑕用讐之圖而我堅委質策名之誼其心寧死而不二其君者豫讓王蠋之說此其勢順而其事之可以必者也二者所處不同而其要於自盡則一也是故生也而無迂身於微倖之嫌死也而無自經於無濟之愧女子之於夫

則亦有然者嘗讀史所載孫翊妻事而壯之當二兇貪於翊妻之色而殺翊也妻既見窘逼於是藏機匿哀陽許二兇以婚而緩其期陰結故將為援須二兇以婚入而遂刃之雪不共之憤於鬪闔杯酒之間斯亦可快矣若夫二烈之事則異於是其夫以羈旅浮寄江壖非有可以豫藉之勢環而指者皆兇人之黨也非有肘腋可結之援方張島之誣其夫以盜而沈之於江島遂欲室其婦而島之黨欲室其女於是婦與其女倉惶闔門自刃以死嗚呼可謂烈矣雖然二人者豈不欲手堪讐人之智如孫妻之為以報夫與父哉而勢有不能也則一死而其事辦矣故嘗合孫妻與二烈之事論之苟機有可乘而速忿以必死則殺身而無益苟事無可濟而濡忍以有俟則危逼而近辱此亦其所處不同而其要於自盡則一也二烈死時兇黨哀其戶而焚之其事秘無人能發之者後數年巡按陳君蕙調得其事島與其黨始伏辜此蓋足以見節義之氣有時而必伸淫兇之誅有時而必不能追也歟二烈者固不必手堪讐人之智而後為快矣事既白於是知縣羅君鴻為之立祠以祀扁之曰二烈而無錫安君如石請予為之記嗚呼此義行不特所以勸節其亦深所以懼兇也歟是有關於世教大矣烈婦某姓其夫某姓某名相傳自通州而徙常熟之白茆鎮也龔立本二烈祠考予少與邵耕夫

先生游耕夫為予言二烈事邑乘碑記多承譌予心識之弱冠後知白茆之許尚有遺老親稔其詳者亟叩得顛末泊登虞山弔節烈而祠且傾圮爰偕耕夫之子濂向邑宰言之邑宰以講學自負姑命撤舊宇而新是圖久之竟置不問予心每怛怛焉此萬歷丁未間也迄今丙子楊侯用魏王兩孝廉議鳩工恢復輪奐聿新予乃得載筆銓次麗牲之石按烈婦盧氏夫姓李祐名先本如臯縣人嘉靖初以避役借棲邑東之金涇有張島周洋者黠而豪盧姿故豔而偶暴其綺羅服島心動擄氏母子置洋幽室中別拷掠祐俾承劫盜意在汚盧盧佯唯唯以其間密從庖厨竊一刃抵夜手刃其女次自刎尸戰栗有聲守者方燭之島焚瘞滅跡而械祐解李兵使兵使疑而縱之還過洋所祐從隔窗諭妻善事後夫不知其已死也島沈祐於江秘莫之發又十五六載而里民馬某被島牽走京口控陳直指憲所條上惡端絕未及茲事直指匿其單下車之初捕島令自款服島首吐茲事直指悚異遂聞於朝請建專祠春秋俎豆制曰可馮侯汝弼即稅課局舊署塑盧像居中女外而侍島跪伏階前所稱二烈祠也語其鄧貢士縣志中島誣引周縈繫獄洋倖漏網又三年洋怙終不悛人共發前隱於孟侯顏始正厥辜又數年羅侯鴻因遷祠山麓乞唐中丞撰文傳不云乎所見異詞所聞異詞所傳聞

異詞其異也蓋慎也然則遺老見而知之予聞而知之邑乘碑記則傳聞者乎回溯丁未閱三十禩而堂構卒如初留心名教者夫亦可以愴然悲慨然慰也已稅課局在跨塘橋西南今猶有稅務巷傳者曰徐宦改建慧日寺西嚴宦又改建乾元宮右易像為主亦中丞撰碑時也張氏耐祭於萬歷甲戌浦氏耐於崇禎丙子張為朱一鴻妻浦為浦位女惡犯宗周唐壽並正典刑張積薪自焚浦投水自盡並祀洵無作色揚名鼎熙京山人魏名冲王名夢鼎董其役者庠士言福子名立本字淵孟俱邑人馮汝弼詩移家遙泛海東船誤入江南草市邊妻為夫讐其白刃女殉父難亦黃泉身違魚腹網常在節顯烏臺日月懸眼底男兒應負愧為題斯刻付新編

季節婦祠在文學里祀明蔣棻妻季氏

徐節婦祠在察院西祀明徐德裕妻葉氏

王節婦祠在糧守道署前祀明王瑞龍繼妻戴氏

本朝順治十六年建

高節婦祠在石梅礮東墓前祀明高祥妻薛氏

本朝雍正六年邑人蔣文肅公廷錫建

張節婦祠在翼京門內龔家橋祀

本朝張素詒妻趙氏

已上祀典

草聖祠在縣學後祀唐縣尉張旭初旭之卒也人傳為縣學生

地神其祠在泮池西頗靈驗元至正間教授陳聚尤加崇敬

後并祀於梓潼神祠明弘治中知縣楊子器卽屠太保庵改

建元張著記古之豪傑之士功衛社稷澤被生民卓然有所

英之氣發為文章清奇任放足以驚世駭眾又使天下後世

開而慕之既而附聖人之廟相聖人之教依聖人而享其食

會幾何哉故廟食為難而食聖人之廟為尤難也唐張旭字

伯英吳人也生有文藝好草書始見擔夫爭道而得筆法又

觀公孫大娘舞劍器而有其神嘗為常熟尉有老人累求判

牒公怪問其故老人曰欲得遺墨為藏耳因出示家所藏書

皆天下絕筆於是益盡其妙每草書臨池泚筆池為之黑凡

家有衣帛必盡書之然後加色甚至醉則以頭蘸墨為大書

乃已夫其為人蓋可知矣及卒世傳為邑學土地神往往吏

於學者惟其人則相之以安且顯其去非其人必傾之或弗

終厥任其報之捷於影響雖然人知其為神而莫之知敬也

至正己亥秋八月天台陳君敬德始來為教授以作新為已

任誓神以不私且學事無大小皆以告神亦無不驗居無何

以相君者焉吁唐去今幾六百年神之靈貺如一日則後今

我達兮千
秋萬歲

孝義祠在阜成門內嶽廟下祀唐龔景才裔孫明刑部主事立
本耐祠即唐麟德元年所旌義宅也

王忠惠公祠在翼京門內古福順庵祀宋太常少卿萬今廢

王學錄祠在讀書臺南祀元學錄裕錢謙益記

盧侯祠在致道觀西廡祀元知州克治

報功祠在翼京門外之東弘治中建祀明夏忠靖公原吉周文

襄公忱

龔立本縣志據鄧志云計宗道建按楊循吉吳縣志及纂修識畧載胥江上夏周祠是楊子器弘治十一年奏建疑此亦子器所創况桑志已標祠名矣

李文安公祠在虞山北麓三元堂左祀明禮部尚書傑

徐公祠在縣西北河陽山永慶寺祀明工部侍郎恪

程公祠在東太平巷祀明工部尚書宗

思元先生祠在縣治西祀明通判桑悅弘治間建祠即其生時

舍館也

徐吏目祠在石梅右祀大醫院冠帶營營恪之孫倭犯邑從知

縣王鈇赴敵死之詔贈院吏目

明嚴徵記嘉靖之季江南郡縣中倭者半而常熟禍最烈蓋邑濱大海民不知兵無寸鋒隻鏃為鬪器無斗粟束芻為食精無壁塢營壘可禦無金湯樓櫓可守殺人盈野血流丹地一縣令一參知一太醫忠憤激烈驅數百烏合市人首扼鯨鯢之寇梟其名王為我豐鼓逮於孤軍絕援兵盡矢竭然後身罹鋒鏑視死如歸三公死而倭亦震潰內地皆得稍稍為備此其功不在睢陽平原下三公功雖等而徐公尤偉縣令以封疆死參知以大臣死死固當乃徐公徒以太醫署衛非有專城百里之寄熊軾隼旟之尊委而去之是可以無死

也顧獨散家財結賓客聚子弟家僮爲兵以與賊抗三年戰
奏五捷一門陣殞九軀不費縣官一尺鐵半升糶而生擒五
巨魁斬首二十級繼同二公奮勇窮追猝然遇伏嗚呼至於
今壯夫義士聞公懋功勁節猶然拊膺裂眚恨不與公同死
豈不堪廟食百世哉幕府軍書上天子憫諸臣忠贈故邕令
王鉄鄉參政錢泮官皆光祿寺卿蔭子皆錦衣衛百戶立祠
奉祀矣獨不及公夫臣忠死既等報功亦宜等臣有大小忠
抑有大小乎斯豈盛世獎貞魂慰死事表率臣工一體至意
哉公之子希顏陳父戰功死節會希顏死恩典久湮矣手希
冉率男生員立敬上書請立祠褒忠如二臣詔可撫按覆題
請旨事功明實忠勇可嘉贈太醫院吏目蔭子入官監鄰值
李公議三人共事豈容位別崇卑一體報功已歎時分先後
况獨屢奏存馘之功乎邑令趙侯奉詔褒忠綜覈招真由地
委督營工希冉資益官給建爲專祠堂寢門垣鐘簾俎豆煥
乎鼎新署其祠爲忠節撫中丞周題請欽賜恩褒忠義扁額
烝嘗祀典咸如二臣公之功與虞山東海同高深矣嗚呼微
希冉父子拮据經畫公之功幾不血食矣天之所以報公者
當在後人乎公名譽字鑑之其先汴人始祖承事郎千十四
公扈宋蹕南遷子省八官龍虎上將軍都漕萬戶救葬海隅
之邵舍里子孫家焉其後少司空恪大司空棧皆皇朝經濟

名臣家傳忠赤公之英風義烈
有所自來王綸闡揚以風當世

嚴文靖公祠在慧日寺西祀明大學士訥

瞿文懿公祠在拂水巖西祀明禮部侍郎景淳子汝說附

邵北虞祠在慧日寺西祀明教諭圭潔錢謙益記

趙文毅公祠在九萬圩祀明吏部侍郎用賢

陳莊靖公祠在鎮江門外桃源湖右祀明刑部侍郎瓚

翁公祠在石梅澗祀明贈給事中拱極萬歷閒朔州知州應祥

建

本朝康熙閒刑部尙書叔元附

楊忠烈公祠在常熟塘澣祀明都御史前知縣事漣萬歷中在

任濬湖築塘治蹟甚偉邑人捐地建生祠逆璫肆虐時檄縣拆毀當事者倉皇奉令棄公土像於水移日不腐見者駭異負匿於頂山寺密修香火崇禎二年贈諡卹蔭祠額復新

本朝雍正十三年糧儲道姚孔鈞重建

瞿留守祠在拂水巖東祀明臨桂伯式耜

微顯祠在學道書院之左祀明陸茂妻節婦錢氏弘治間建後

移慧日寺西

龔立本縣志玉峯龔詡有哀陸節婦詩周木出示楊令因創祠表節并鐫詩于石陳播題跋謂

婦之節義必夫與子貴者方得顯揚其在寒微湮沒者不可勝數也龔詡哀陸節婦陸家有子賤且貧一生家住琴川濱惟能擊鼓與吹笛更無餘策堪資身其妻本是田家女日不知書心却古蓬頭垢面破衣裳樂與夫君共甘苦夫君臥病忽經年瓶無粒粟囊無錢晨昏何以給饘粥一飽十飢誠可憐眼中骨肉猶行路況彼鄉鄰官相顧彷徨悽苦只天知嘿

嘿更無人可訴一朝乞得斗升歸濟急聊可全燒骨不道還家日將暮夫命已逐殘雲飛躡地號天幾絕氣祭畢隨時死相繼誰知邨落婦人心有此堂堂真節義老夫聞此十年餘每歎丈夫多不如芳名未免久湮沒春秋大筆何人書春秋大筆何人書

于公祠在慧日寺西祀

本朝知縣宗堯康熙十一年建乾隆九年邑人許坤重修

陳公祠在阜城門內嶽廟下東偏祀

本朝知縣守創康熙六十年建

東嶽廟在縣西城內虞山南麓宋時建

盧鎮琴川志東嶽行祠依山高聳規模雄偉歲

久摧圯屢經再新然創造之由無碑可攷龔立本縣志按桑志云淳熙九年建豈別有據邪按延祐元年徐亨給帖廟基二十六畝三角有宋魚鱗册則宋建明矣每春季賽社喧闐傾城聚觀云

本朝康熙中於廟後建五嶽樓一在縣北四十里福山宋至和

初建元符間增拓盧鎮琴川志至和七年魏邦哲為之記以嶽靈誕日旁郡人不遠數百里結社火具舟車齋香信詣祠下致禮敬者吹簫擊鼓揭號華旗相屬於道又載父老之語肇祀之日有雷幅乘潮而至乃嶽神像居民欽祀而加信焉而李黨為之記則謂倡於至和增大於元符廟貌威嚴禍福顯應有胡子文者因醉侮慢善元至正二十年重修遂昌鄭惡判官神怒譴之事見夷堅志

器知州王某重新廟制增建前軒仍為若干楹以祀福濟李侯王又于廟左作天妃宮復建方丈室以居司廟之人又作官廳以待守土吏歲祀之日

明嘉靖末倭亂焚燬僅存遺址

本朝康熙五十一年重建

徐偃王廟盧鎮琴川志在縣西四十二里永春鄉盧志廟在常熟縣西四十五里膠山近江陰永春鄉

吳王廟在縣西二里虞山麓越王廟在縣西北七里盧鎮琴川志二廟並

要離廟在縣西南四十里歸政鄉

莫耶廟在縣西南二十里莫城明吳訥詩吳人鑄劍處荒城俯湖濱殘鑛百鍊餘城畔今猶存

龜文與縵理騰光動蒼旻劍可一人敵焉能建奇勳咄哉彼何愚劍成終殺身

春申君廟在縣西南三十六里練塘市

祠山廟在虞山巔乾元宮右盧鎮琴川志宋淳熙間邑人迎神像塑於乾元宮山門之東偏湫隘

淺迫不足以妥靈紹熙癸丑邑人靡金錢建殿宇湖山相映翼神之休祈禱輒應累朝敕封正順忠祐靈濟聖烈王在廣德州靈跡尤著

東平忠靖王廟在嶽廟左盧鎮琴川志按王淮陰人張有嚴之子唐開元元年八月十八日生十四

年七月二十五日入滅為神護國救民封成濟侯宋太祖親征太原川水泛溢上憂之水忽合師遂濟空中見神來朝加

壇廟三

卷二十三

蘇州府志

征應護聖使者熙寧五年陞濟物侯宰相王荆公令有司勘會靈顯事跡再封忠懿文定武寧嘉應侯南渡以來神復響荅於浙閒而此方尤顯著累封東平忠靖王邑人尊事之殿基舊甲隘淳熙九年重建龔立本縣志明弘治中查毀淫祠遂以唐忠臣張巡實之像作厲鬼狀祠前有井品泉者以為勝於虎邱

孚應昭烈王廟在嶽廟右明洪武二十一年建神事迹莫詳今祀唐忠臣許遠蓋又因張廟義起云

中山永定公廟在孚應廟右東向祀宋太尉劉錡龔立本縣志元至正三年建

或云建於紹熙修於至正或云乾道末按察胡榮建俱未詳又福山阜成門外秦坡澗下

俱有廟明鄧鞅記劉太尉祠祀宋將武穆劉公也公名錡行

爽軒傑倚山而起有石識云乾道末按察胡榮建考之南渡官無按察轉運使判實其任豈胡嘗為之與祠至元而敝當其時相傳有白馬自外境入祠中不去修祠者因導之以哀眾財事頗異我明邑人事公尤謹成化中修其敝者鉅姓王

民潤嘉靖十六年其子環嗣新之而省掾金泰者人唐瀾以眾力助先是門限於崖石爰伐去之廣其址祠右為室六楹而臨湖吳中諸山可坐挹以其一為守祠之舍總費金六百而請予記夫公之惠政多在淮東臥疾在京口其卒在臨安都亭驛邑僻在吳北鄙曷為祀之君子所以觀公之大也公在建紹與韓岳並奮忠義值賊臣怙權於內岳戕韓擯而公亦為奸黨所忌而每壞其成其不瀕危者任猶未重也然公復仇奪賊之義死而不易觀其當虞彬甫之問疾慷慨數言幽憤於邑平生志蘊槩見於此悲夫史稱公有儒將風所謂儒豈佔俾誦說之長已哉公之忠義許國見於行事行師制勝出正用奇合於古法其進與退關乎治亂俊偉勁挺不易節以求容非有得于儒易克至是獨惜時之君相舉不能知不知故不能任而知而能慕者顧于偏州下里之士庶見之此祠之所由作可以觀公之大也岳祀於杭韓近歲祀於吳山公卒未久而虞祀之皆本於人心之義義也者天下後世之大公國是有未定人心之公義乃能定之則舉而崇之於祠何但如祭法所列而已俗尚神境中多大祠往往有名號其最有名義者公也故其敝也必治而存之則鞅之今者於王之請固知文不足為祠重其於義也宜有言焉爾

長興李烈士廟在致道觀西廡龔立本縣志元册封靈惠英烈

建俗呼觀為李王宮者以此至正六年修鄭東有記邑到處

有廟不可勝書在常熟塘濱者尤古去城南三十里宋時賜

袍及珠花尚存元鄭東記畧海虞致道觀有海神李王祠神

吳興長興人死而能靈吳興人祀之宋理宗時吳興潘氏兄

弟謀叛事聞理宗將發兵屠城神夜夢於理宗及丞相史彌

遠且言曰潘氏當誅民實無辜殺無辜不祥理宗寤而意解

神有功於吳興之民如此海虞去吳興為近故民祀神之盛

擬於吳興向者時值流毒濡染州民共詣神下取柏葉劑井

水歸煮飲之而疾即愈至井竭柏為之盡神有功於海虞之

民如此國朝歲漕吳楚諸郡之粟三百萬石道遼海而及畿

無事神有功於朝廷如此在祭法實所當祀者也

利濟侯廟初在縣治西即所稱金神廟也明弘治中改廟為陰

陽學遂徙於報本道院之側

真武廟在拂水巖上明嘉靖中孝廉褚應韶肇基里人袁奎糾

資拓廟神往往示靈異遠近士女瞻禮惟謹

已上舊祠及土俗所祀

昭文縣城隍廟在縣東四十步

本朝雍正十一年即錢謙益故居改為之

關帝廟在縣東南偏九十步

本朝雍正八年建

黃公祠在東塔寺西祀明遜國忠臣鉞初在文學書院西南隅

萬歷三十五年知縣耿橘移建丹井西後圯

本朝乾隆十一年改建今所

王孝子祠在方塔街祀

本朝孝子松齡

已上祀典

巫公祠在賓湯門外祀商相咸及子賢

本朝康熙二十五年奉文毀淫祠知縣楊振藻卽東莊廟改爲之今廢

言子祠在支塘鎮

本朝康熙二十五年奉文毀淫祠卽五仙廟改爲之今廢

吳文恪公祠在縣東北祀明都御史訥成化三年知縣甘澤建

龔立本縣志按舊志稱在報慈里令楊子器置祭田三十畝者蓋指家廟云

張修撰祠在縣東北半里祀明修撰洪弘治二年知縣楊子器

卽東殿聖王廟改建置祭田四十四畝

二陳祠在集福經堂側祀明中丞察祭酒寰

季先生祠在文村里祀明教諭箴

成義祠在顧家橋祀明太學生譚照及弟曉

二人捐貲築城禦倭時號譚半城見

縣城詳見雜記

東嶽廟在縣東南一百二十里橫涇宋咸淳十年建

東殿聖王廟

盧鎮琴川志云在縣治東北一里三十步莫詳建立歲月慶元志稱爲子游舊廟然無所考龔立本

縣志弘治中改爲張修撰祠今按其地僅有小廟供李烈士

真武廟在迎春門外均墩邨宋乾道間建

炳靈公廟在縣治西北傳是火神明洪武十八年建弘治間知

縣楊子器毀正德二年重建

按搜神記神乃東嶽三郎宋祥符間改封炳靈公

本朝雍正十一年增祀火神於正殿

清源妙道真君廟俗呼二郎廟

詳見長洲縣志

在鎮海門內

龔立本縣志云弘治

十一年改祀夏忠靖周文襄今祀真君如故或云鄉民王會
 奏復周虎有碑宋周虎碑記開禧二年虜人合諸道兵長驅
 入寇和州虎方奉詔守光楚刺和時虜勢孔熾倉卒戰弗利
 城幾陷會虎方夢見一鉅人冠三山冠衣白袍謂子曰忠義
 者神明所默佑吾隋人趙昱也知子有忠義以故至此以助
 子當益奮其力護衛一方民虎驚起而歎曰是何神也豈可
 愛尺寸膚不為社稷計遂進部下命於眾曰吾奉天子詔為
 國家守臣今膚寇充斥如此惟有死報國而已庶上不負天
 子之付託幽不負神明之告戒達虜合戰鼓譟入城闔風霧
 四塞咫尺弗克辨未幾像有光燭寨前奄見一人躍馬持杖
 冠袍一如所夢越官軍風霧奪消士卒益有生氣殆默佑虎
 者虎乃三十三戰王每昭靈而無一戰不克間或病卒起呼
 王即應而久即報瘳由是軍盛大振殺虜驍將以千數最後
 射死右帥石砣礎虜氣沮折大創引去和始安城得以全而

江淮無恙王之功寔居多矣虎戴其靖國功治佑民力聞上
 乞崇徽號貌於和使其邦世祀於城不忘也天子曰俞封護
 國聖烈昭惠靈顯神佑王龍章錫號固皆報功其中茂績而
 是廟寔由作始王從李珣隱於青城山自負奇節能為人下
 隋煬帝偉其才起為嘉州牧州方以犍龍之害民皆罄罄早
 不防暮王出奇策以除郡人神之隋亂隱去不知所終江水
 泛溢防斷不補蜀人見王青霧中乘白馬超波而過水患遂
 平民德之建廟灌口以昭其靈異唐太宗時上不豫禱於王
 疾遂瘳詔封神勇大將軍明皇幸蜀護蹕有靈加封赤城王
 我真宗命張乖崖平蜀賴神相告戒言於朝改封清源妙道
 真君至其起仙洞震靈關破妖浪神含沙歷歷見功莫可以
 悉嗚呼王之護國益民勵將兵除天下害而受天子知以承
 洪惠舊矣至是復有茲舉者蓋王之功有力於曩王之惠益
 崇於今虎以吾邑有廟在拱辰門內蓋邦人以神能平江患
 去灾弭禍故祀之如此虎謁焉見榱桷煥然屋瓦廊廡基宇
 廣袤悉如制思前豐功偉績遂勒於石以垂不朽雖然王之
 神在天下如元氣流行於四時觸之輒感叩之輒應殆與天
 地日月相為周旋吾邑民仰其靈貺多矣使天下而有所未
 感殆仍感焉然降豐年除水旱平疫癘弭盜賊篤名邦而周
 於天下則王之昭聖典於無窮而虎之感王靈于永世也斯

廟之立豈有瀆哉
庸書此以詔來者

東平忠靖王廟在方塔前祀唐忠臣張巡

劉太尉廟在縣東徐市祀宋江淮制置使錡龔立本縣志明嘉靖甲寅倭將及市

見神橫刀立雲端一境獲全

長毫廟在縣東鹽鐵塘上祀金元七總管錢陸燦縣志明初有陶道敬者與奚氏為

仇陶將疏闕下奚掠之縛投白茅陶呼神見神立水中縛自解得脫

龍王廟在白茆關口

已上舊祠及土俗所祀

吳江縣社稷壇在北門外柳胥圩舊在縣治西盧志宋在縣城西南元在州南

明洪武四年移西門外舊府志壇高六尺成化八年知縣王

迪修嘉靖三年知縣王紀重建萬歷十五年圮

本朝雍正十年知縣趙軒臨移今所

風雲雷雨境內山川城隍神壇在東門外南湖圩舊在縣治西

南明洪武四年移南門外成化八年修嘉靖三年重建隆慶

五年知縣韓鎧重修萬歷中圮

本朝雍正十年知縣趙軒臨移今所

先農壇在東門外位字圩

本朝雍正六年

敕建

厲壇舊在北門外明洪武五年知縣許莊建成化八年修萬歷

四十年移置南塘學宮之東北舊有鄉厲壇在縣境共五百八十六所今久廢

已上震澤縣合祭

城隍廟在縣治北一里地隸震澤即舊昭靈侯廟明洪武三年知縣

孔克中建宣德五年縣丞王懋本修景泰四年燬知縣賈亮

重建成化八年知縣王廸修嘉靖四年巡按御史許中誤毀

邑人重建三十三年燬於倭重建四十三年修萬歷二十七

年重建崇禎十五年修

本朝順治十年修康熙四年重修五十五年修

關帝廟在縣治西

本朝雍正三年修

火神廟在北塘巷永定橋東張王廟內震澤縣合祭

劉猛將廟在東門內仙里橋南震澤縣合祭

節婦祠在縣學西

本朝雍正元年

詔建震澤縣合祭

太湖廟在垂虹亭南祀太湖之神舊在江之南醋坊橋側宋祥

符間建紹興十五年賜額永利元至元三十年千戶杜福重

建明宣德十年知縣賈忠再建萬歷十四年知縣江鍾移建

今所

本朝順治二年燬康熙二年重建歲以春秋二仲上庚日致祭

甘泉祠在縣治南六里石塘第四橋北祀甘泉龍神初建莫考
 明弘治十三年知縣孫傑重建嘉靖三十一年修崇禎十四
 年重修

本朝順治十八年重修每歲與太湖廟同日致祭元鄭元祐甘泉祠禱雨記

吳概以水為國東出而為吳江其州郭低窪人烟聚落於浦
 激之間左江右湖雲濤煙水其為神龍之宮靈怪之宅尚何
 異哉自非神龍依人以著靈而人托龍之休以為命則其四
 封之內呼吸而沼之者無難也州之東行涉江湖而為梁者
 相望獨第四橋之下水最深味最甘唐陸羽所品第六水也
 世傳有龍居之州人即橋北水之中止置祠享焉謂之甘泉
 祠其來久矣至正三年夏大旱禾焦然就槁時高昌稟雅實
 理公為達魯花赤憂心惻然乃宿齋戒致情祠下再拜稽首
 為民請命昭靈觀道士富如心用其教法役神召龍煉鐵符
 投橋下符入而雷自水起元雲四垂雨隨至公驚喜以手加
 額曰神明不遠如此哉般迎龍水至州署有赤鯉躍入殿中
 雨既告足即昭靈醮謝復迎牲祠下合樂大祭以答靈贖州

遂有年於是州民歡然曰吾州依龍以為命故水旱必禱然
 未有若我公之孚合響應若執左券交相付者先是公為泗
 州尹天久雨公箋詞請於上帝曰其減一紀之壽祿願起百
 姓於泥塗詞焚而霽公之臨政愛民至於不惜身命如此於
 是州民請紀其事作
 甘泉龍祠禱雨記

三高祠在江之南雪灘上祀越范蠡晉張翰唐陸龜蒙初在底
 定亭南宋元祐中知州王辟建繪像於壁元符二年主簿程
 俱重建三年知縣石處道始塑像祀之建炎初燬於兵紹興
 三年重建乾道三年邑人王份獻釣雪灘地知縣趙伯虛為
 堂遷之寶祐三年知縣曹良朋重建份孫栗又割地以廣之
 淳熙六年知縣陳翥重修元泰定元年主奉陸元吉置祭田
 五十畝元季祠毀於兵明洪武元年知州孔克中重建成化

八年修

本朝康熙四十一年重修

宋石處道三高贊并序范蠡去越適齊自謂鴟夷子張翰縱任不拘時號

江東步兵陸龜蒙隱居松江稱甫里先生長橋東南舊有小堂圖三人於壁元符三年春始塑像祀之因稍正其名號而紀其始末復作贊以美焉范子三徙才惟所施功就名顯國霸家肥進退在我卷舒隨時鴟夷為器盛酒以皮多所容受弛張咸宜達哉若人寔亦似之季鷹曠達清才絕倫見幾未然棄官如塵任心杯酒適志鱸葦脫身於難篤孝於親步兵之流江東一人行不越禮尤得其醇魯望高放身與世疎心專論撰跡寓耕漁饘粥不足辭章有餘江湖游隱惟我故居召命雖至其守莫渝先生如在甫里邱墟范成大三高祠記乾道三年二月吳江縣新作三高祠成三高者越上將軍姓范氏是為鴟夷子皮晉大司馬東曹掾姓張氏是為江東步兵唐贈右補闕姓陸氏是為甫里先生三君生不並世而鴟夷子皮又嘗一用人之國功大名顯而去之季鷹魯望蕭然靡儒使有為於當年其所成就固不可喻度要皆以得道見微脫屣天刑清風峻節相望於松江太湖之上故天下同高之而吳江之人獨私得奉烝嘗以夸於四方若曰此吾東家

邗云爾邑大夫伯虛以故祠偏陋將改作鄉老王份獻其地雪灘乃築堂其上告遷而奠焉且屬石湖范成大為之辭噫不有君子其能國乎今乃自放寂莫之濱掉頭而不顧人又從而以為高此豈盛際之所願哉後之人高三君之風而述其所以去為世道計者可以懼矣至於豪傑之士或肆志於軒冕晏安留遲卒悔於後者亦將有感於斯堂而成大何足以述之然屈平既從彭咸而叢桂之賦猶招隱士疑若隱處林薄不死而仙況如三君蟬蛻溷濁得全於天者嘗試倚楹而望水光浮天雲日上下風颿煙蓬飄忽晦明意必往來其間成大亦何足以見之始倣小山作歌三章以招焉遂從而歌之曰若有人兮扁舟撫湖海兮遠遊眾芳媚兮高邱忽獨君兮不可留長風積兮波浪白蕩搖空明兮南極一色鏡萬里兮鞭魚龍列星剌剌兮其下孤蓬眇顧懷兮斯路與涼月兮入滄浦戰爭蝸角兮昨夢一笑水雲得意兮垂虹可以躋棹仙之人兮壽無期樂哉垂虹兮去復來載歌曰若有人兮橫大江秋風起兮歸故鄉鴻冥飛兮白鷗舞吳波鱗鱗兮在下嗟人胡為兮天地四方美無度兮吾之土膾脍兮雪霏登菰葦兮芼之水仙續兮胥命君可望兮不可追頽倒影兮揮碧寥娛燕息兮江之皐棗蘋堂兮廡杜若一杯之酒兮我為君酌又歌曰若有人兮江北之渚披雲而晞兮頽煙雨菊

莎兮杞棘歲晚兮何以續君食佃五鼎兮腥腐羞三泉兮
 終古千秋風露兮歸來故墟月明無人兮蒼石與語牛宮御
 兮生蒲荷潮東西兮下田一波訪南徑兮鄰曲山川良是兮
 邱隴多稼九畹兮今其刈聊春容兮茲里是歲六月既望書
 遺邑人使習以侑祠伯虛請遂以為記宋蘇軾詩誰將射御
 教吳兒長笑申公為夏姬却遣姑蘇有麋鹿更憐夫子得西
 施浮世功名食與眠季鷹真得水中僊不須更說知幾早直
 為鱸魚也自賢干首文章二頃田囊中未有一錢看却因養
 得能言鳴驚破王孫金彈丸明高啓功成不戀上將軍一舸
 歸游笠澤雲載去西施豈無意恐留傾國更迷君洛陽忽憶
 膾鱸肥便趁秋風問釣磯猶恨季鷹歸未早不邀二陸共船
 歸鴨羣無食水田荒風雨孤篷載筆床猶有新詩驚太守醉
 中揮翰
 木蘭堂

三忠祠在東門外接待寺西祀吳伍員唐張巡宋岳飛明洪武
 元年知州孔克中建嘉靖四年知縣王紀修萬歷十七年巡
 按御史徐元重建

本朝順治十六年重繪神像乾隆十年重修

徐師曾曰吳江舊有畫像三軸筆法

頗工不知作於何人蓋卽三高像而其名未立也宋熙寧中
 縣令林肇贖其本而繪之鱸鄉亭榜曰松陵三高畫像自是
 始有三高之名然未祀也祀之自石處道始厥後孔公克中
 以為人如三高誰與為國乃立三忠祠以配之相沿至今四
 百餘年人方仰其遺風而於祭法則未暇議也惟宋蘇軾劉
 寅元瞿裕謝應芳近時謝常莫旦數公議之謝氏上饒參政
 書大畧以為禮不祀非族況可祀讐敵乎范蠡進美女獻寶
 器以惑吳之君臣而墟其宗社吳人之讐也雖其勇退一節
 或有可稱而私西施事營殖其陋已甚有何風節之足慕乎
 吳人欲祀高士當以太伯為主配以仲雍季札而列張陸於
 從祀黜范蠡而去之則得之矣饒竟不省由此言之蠡之當
 黜於吳無疑矣至於三忠則亦有可議者夫郡於子胥既有
 專祠復祀於吾邑近侈然先儒謂其所浮之江卽松江則祭
 於死所猶可說也彼二公者何與于邑而祀之邪昔漢丞相
 忠武侯之沒蜀人求為立廟朝議以禮秩不聽百姓遂因時
 節祭之道陌上言事者或謂可聽於成都立之帝禪不從習
 隆向充言巷祭野祀非所以存德念功若盡順民心則瀆而
 無典建之京師又偏宗廟可令其近墓為之所親以時設祭

故吏欲奉祠者皆至廟斷其私祀以從正禮乃從之為廟於
沔陽漢人於忠武侯其難之也如是非以禮秩之不可紊乎
今二公之祠既各有所不應後祀在此也若但取其忠與高
而不稽諸祀典則巢由箕比之徒當先之矣司風紀者可不
按祭法而正之哉

顧公廟在北門外三里橋東祀陳黃門侍郎野王王志或云祠即野王所居

故其地初廟甚庳陋宋建中靖國初知縣石處道改建明宣
名顧墟

德二年知縣賈忠重建成化八年知縣王廸修崇禎七年知

縣章日烝重修

本朝順治八年重繪神像康熙七年增建兩廡門樓采石處道顧公廟碑

建中靖國元年秋九月知吳江縣事石處道以事至顧墟見
古祠陋甚問之顧公廟也及進謁祠下惟繪形於板衣冠不
正尤可駭焉於是撤除腐敝改作基構立其像設勝以位號
春秋祀之按南史公名野王吳郡人精記默識博究載籍天

文地理卜筮占候異書奇字莫不貫通其所撰集並傳於後
篤誠至性厲精力行言無過辭動無失色志踰其貌勇溢於
義內孝外忠罔見其闕當是時中原沒於胡虜而東南繼統
不一典章制度綴緝僅存使後世可考而知焉公與諸儒之
力也惟顧陸朱張吳之舊姓其顯人高士有德有功不為少
矣而祀於今者甚寡公之此祠迺立於窮閭之濱獨以名存
而不廢亦豈偶然乎哉新廟既成民愈知敬皆以為不可復
默默而無傳也因書其大畧且作詩以刻之庶幾有能歌以
祀公者辭曰臺城赫赫東南雄累朝文采諸賢功公為堂堂
儒者宗詞學炳煥虎與龍幼則穎異非常童丹青著蔡靡不
通字書淵海藏心胷廣吞具區及吳淞入竭我孝出盡忠勇
奮於義於其躬黃扉棘寺咸雍容國史邦禮任獨隆論著深
博堅莫攻特立於世衡廬峯寂寥誰何詢靈蹤煙藹漠漠江
波中一新祠像人益恭衣冠髣髴瞻遺風公惠斯民年屢豐
德祀永永傳無窮

吳孝子祠在絃歌巷祀明全孝翁璋萬歷二十三年建王錫爵

記

沈公祠在鐵局巷北祀明戶科給事中贈太常寺少卿漢初在東明巷北崇禎十五年建瞿式耜記後燬於兵

本朝康熙十三年移建今所

周忠毅公祠在永定橋東祀明御史贈太僕寺卿宗建崇禎二年敕建

本朝乾隆四年給帑修

周相國祠在縣治東北祀明大學士道登

本朝康熙二十五年建

孔公祠在縣治東祀

國初知縣允祖康熙元年建公以順治二年死湖寇

愛遺亭在垂虹亭北祀明尚寶司少卿葉紳四川布政司參政

吳巖湖廣按察司副使沈啓舊在浮玉洲萬歷七年建十八年以濬河去亭址改建今所後廢

本朝乾隆十年重建丁元正重建愛遺亭記愛遺亭者因前明

江紳士之請建以祀尚寶葉公紳大參吳公巖副使沈公啓

按國史縣志所載三公治績其愛君愛民之心達於天下而

吳江之人乃必祀於其鄉則以三公之指陳建白所以捍災

禦患為功于吳江水利甚大而久也夫吳江水區也居三江

之首上承太湖湖水泛濫則吳江先受其害而後及於比鄰

之州縣考弘治七年田滄幾盡尚寶葉公實為陳請濬河而

水一治越正德十三年水滄田十之七大參吳公疏聞其事

蘇州府志

卷二十三 壇廟三

三

亦輾轉失實方音傳譌或呼為阿姨或傳會陸魯望震澤舊事書為鴨漪去秋有修志之役循名核實得其顛末於葉氏譜牒及屈志所載李黃語會紳士以復建亭為請相與咨度其地越日有業斯土者以其故地來獻因命三家子姓尅期興工前為大門後為亭翼以迴廊奉三公之像於亭之中而仍顏之曰愛遺約費錢四百餘緡三家子姓因得無廢先人之祀典而吳江之人亦得遂伸其報以慰沒世不忘之思可不謂盛事歟余惟吳江水利不講久矣江口淺狹支渠壅闕竊恐數年之後或有受其害者暇日與紳士之有識者講明切究亟欲為思患預防之計未有就緒而余去讀三公之奏疏圖考不能不愴然興感語云前事之不忘後事之師也今而後倘有能繼三公而起者乎跂予望之矣

已上祀典

昭靈侯廟在縣治東北祀唐刺史曹王明

寰宇記吳江縣有曹王廟即唐太宗第十

四子也調露二年授蘇州刺史善飛白鳥跡書今福善寺額通元石像皆其跡也先天二年敕立祠於松江殿基下有石盆嘗有黃蛇盤於其上揭而視之得大鏟大斧各一盧志廟在縣治東四十步城隍神也梁開平三年淮兵圍吳錢鏐禱

有應嘗再修之以事奏聞四年敕封昭靈侯元符三年重修立碑縣志宋元間俗傳侯為城隍神故名城隍廟元大德三年改名衍慶昭靈觀而城隍之稱如故明洪武三年知縣孔克中別建城隍廟於後河北舊廟乃止稱昭靈觀縣境各鄉鎮又有廟凡十餘處皆土人所建也宋石處道修昭靈侯廟碑元符三年春正月上以盛德即大位旋乾轉坤一正造化號令風動巍巍煌煌窮廣極袤有知無形莫不被服其寵光而翱翔乎和氣凡天下神祠列於祀典者必命有司致祭而修完焉吳江昭靈侯廟內腐外毀左支右吾偶形繪容缺滅弗備春秋薦享亦不復設名在實廢禮甚易而人莫行大恩既降協於輿情乃鳩羣材乃會眾工官給其費私獻其力革陋為壯除倣以新門廬潔嚴儀像赫赫幽秘恍惚若憑而安考於圖記乃唐曹王明太宗第十四子也善飛白鳥跡書見稱於時調露中為蘇州刺史遺惠餘愛民不能忘先天二年始立此廟有黃蛇居其中人益異之水旱疾疫是禱是祈罔敢或怠而舊無碑刻俗失其傳朱梁開平間淮寇圍蘇州甚急錢鏐禱之輒自潰去江表以寧既而奏其事乃以為漢臣而封此侯爵豈褒顯之意歟蓋廟食于縣境凡十有二號曹王者七李明王者五去唐未久載籍具存而時代之差以近為遠稱謂之謬或斥其姓名嗚呼修廟之歲霖雨露足江湖

不淫土田加闢年穀大穰於是邑之僚吏鄉之耆老皆以為祀事不可不舉也故備禮以格之名號不可以不辨也故諭其名而正之本末不可以不紀也故摭其實而書之於以頌上德之萬一而揚神休於無窮其辭曰皇帝正位浩浩其仁升日之旦發天之春隆恩誕敷流載溢覆於明於幽罔有遺漏具區之旁松陵之墟霄澄壤潔神靈是居有唐曹王太宗之季舊牧斯人人懷其惠聖政伊始嚴祠孔新禮舉名辯昔屈今伸報稱維何心蠻貢祉彌億萬年陰相宸辰

秦太尉廟在黎里鎮

縣志太尉名乾宋寶慶中吳興潘壬李全作亂州郡響應太尉招集義勇保衛鄉閭

一鎮以寧眾立廟祀之

劉公祠舊在平望驛南祀明知縣時俊萬歷中築石塘成民感其德故立祠祀之

本朝順治間祠廢康熙五十三年重建於嶽廟旁

東嶽廟在縣治東北初建莫考自明以來屢經修建香火最盛

又一在二十八都梅墩邨宋建炎三年高宗駐蹕梅墩行柴

告禮因建廟命隨軍轉運使趙開為之記元至正二十四年

徐安卿捨地拓之明正統四年重建八年燬再建一在卓墓

一在八坼一在黎里

宋趙開東嶽廟記今上皇帝車駕南巡駐蹕松陵之梅墩乃於整飭六師之暇

特念聖武布昭乎遐邇王靈丕振於華夷四海永清萬姓悅服悉本於天地山川神祇之所佑相爰恭行柴告東方之禮崇建嶽廟於梅坡之良隅中立正殿三楹奉嶽神像翼以兩廡衛以石垣仍於殿之西墀力加畚築構齋堂庖爨滷室凡三十餘楹以為道眾祝釐居守之所羣工告成皇上喜率百僚詣殿庭載瞻載拜奠以玉幣精虔有加而神亦恍若降臨於綵雲杳靄間靈旗續蕤鸞鶴迴旋風日交暢而君蒿悽愴之天悉萬姓崩角稽首之地神人協慶福有攸歸皇上乃命臣開為之記以詔後爰序績如右而系之以頌曰於赫有宋享有中國河嶽效靈翼我皇極泰山有神永奠東土茲翼聖駕陟降斯所帝乃曰都盍享以祠基殿妥靈皇釐是資磐石宗社萬古弗泐佑我生民歲蕃黍稷麗牲有碑帝命勒勳後

有式者尚考斯文
建炎三年月日

順濟龍王廟在利往橋南宋紹聖初知縣江躋建翁挺記紹興十五年賜號安惠元至大四年重建中有陽山龍母廟

糜城王廟在二十六都糜塔詳見古蹟

張王廟在縣治西北永定橋東元至正十二年建祀廣德祠山之神明初里人供祀五方神像

本朝雍正九年知縣趙軒臨毀其像仍祀祠山神十年增祀火神於正殿額曰火神廟

吳王廟在宋邨陳王廟在程林一在茆塔一在充浦又金城廟在桑盤四明王廟在庵邨蘇將軍廟在莫舍

慧感夫人祠在聖壽寺中詳見吳縣

已上舊祠及土俗所祀

震澤縣先農壇在西門外梅里邨

本朝雍正六年

敕建

關帝廟在西門外中尖圩地隸吳江明嘉靖間邑人吳滂建

本朝雍正九年重修

周忠肅公祠在北塘巷祀明吏部尚書用天啓三年建

已上祀典

諸葛武侯廟在薛步邨初建無考後侵爲民居明正統中縣丞

柳臻復之

周瑜將軍廟在七都孫僅邨初建無考明崇禎間修

本朝康熙十三年重建

盛將軍廟在三都西盛墩

姑蘇志按圖經吳赤烏初命上大夫倪讓將軍徐傑司馬領濠寨盛斌分

撥地界建涓作田而斌有功于吳江既卒邑人即其墓置廟互見墓

昭靈侯廟震澤雙楊歛邨胡店梅堰南麻平望凡七處

張南軒祠在七都半澤邨元至正間建

本朝乾隆十年重修

三賢祠在震澤鎮祀宋朝奉郎王蘋教諭陳長方秘書丞楊邦

弼寶祐元年邑人沈義甫建元至正中設教諭以主祠事元

季紅巾賊燬明洪武初沈善長遷之思范橋左天順中廢嘉

靖十五年沈嘉猷重建於普濟寺東置祭田三十畝

本朝康熙中廢今重建又見社學

東嶽廟在震澤鎮又充浦雙楊檀邱北麻諸邨皆有之

南嶽廟在十四都宋乾道中建

簡城王廟在簡邨高城王廟在馬賦邨頓基王廟在平望

雲仙廟在雙楊邨初建無考明弘治中重建

舊志姊妹四人俱成仙

已上舊祠及土俗所祀

蘇州府志卷二十三

蘇州府志卷二十三

蘇州府志卷二十三

蘇州府志卷二十三

蘇州府志卷二十三

蘇州府志卷二十三

蘇州府志卷二十三

蘇州府志卷二十三

蘇州府志卷二十三

